

Xcarta San Pablo huantu pulh tzoknikolh Corintios

XATAPAJMUJUN TACHIHUIN:

San Pablo tzoknikolh yuma carta xtacanjalanin huanti macxtum xlakataquilhputanankoy c-siculan huantu xui c-xacachiquin Corinto. Hua litzoknanikolh sampi ni luhua aktziyaj xilamako xtalacapastacnican cumu catihua huanti xliakchihuinanikoy atanuj talacapastacni huantu ni luhua xtaluloktat Dios. Chu cumu chuna xlacan ni aktziyaj xuilako luhua luhua taklhuhiit xlakchimakó c-xlatamatcan huanti akstitum xlipahuamputunkoy Cristo. Xtapapitzimakó, pulacluhua xtatumako sampi tanuj tanu xlacapastacnankoy.

Pablo na xmaakstitumiputunkoy c-xlatamatcan sampi makapitzin xlacan huanti xtlahuamakó luhua huantu laclixcajnit talakalhin huantu ni tzinu mininikoy tlahuakoy huanti lipahuankoy Cristo. Hasta makapitzin xlacan chunatiya xlitzaksakoy lantla xapulh xlakataquilhputakoy caj tatlahuamaxxtu, ni xmakaxtakayamakó xtasmanincan, xahuachi luhua xliaklhuuatnankoy xliškallala, xahua xlitlihuaka huantu Espiritu Santo catihua xcalimatlahui, ni xakataksoy pi yuma liškallala, chu litlihuaka hua xlimaxquikocani laquimpi nalalimaktayakoy c-xtacanjalcán. Na chuna acxni putum xtamacxtumikoy pi macxtum nahuayankoy laquimpi chuna nalilacapastackoy xlinin Jesús, luhua huanti cata caj xkamanantaxtukoy, chu makapitzin litum atuya xpuhuankoy, xmacpuhuankoy pala xlicana, usu ni xlicana lakastakuanankoy ninin calinin.

1 Quit Pablo huanti Dios lacsacnit naclitaxtuy xapostol Jesucristo. Quit, xahua Sostenes huanti ctzoknima Pablo yuma xcarta.
²Quit Pablo ccatzoknimán yuma carta laquimpi naccamalakachaniyan xlipacs huixin natalanin huanti macxtum lakataquilhputayátit Dios c-xacachiquin Corinto; huixin huanti Jesucristo matanujkonit laquimpi namaktapaksiyátit yuma amakapitzin luhua natalanin xala alacatunu cachiquin huanti xtachuna lantla quin na lakataquilhputakoy

Quimpuchinacan Jesús sampi na hua Xpuchinacán. ³Clacasquin pi Quintlatican Dios, chu Quimpuchinacan Jesucristo ankalhin cacasiculanatlahuán, chu cacamaxquin tlan latamat.

Pablo paxcatcatzini Dios caj xpalacata huantu tlahuanit c-xlatamatcan

⁴Quit xaliankalhin cpaxcatcatzini Dios caj huantu mimpalacatacan, sampi luhua luhua huantu xla calisiculanatlahuanián caj xpalacata

Jesucristo. ⁵ Caj cumu lipahuanátit Cristo Jesús, Dios camaxquínitán makapitzín huixín lñuhua liskalala, chu tastácat laquimpí lihuana naakataksátit huantu xtapaxuhuan, chu laquimpí tancs nalichihuinanátit xtalacapastacni. ⁶ Cxaxuhuy pì chuná Cristo makantaxtíñit c-milatamatcán huantu ccamasiyuninitán natlahuay, chu tlan huixín limalulokátit milatamatcán sampi pacsá makamaklhtinánitit huantu malacnuy natlahuay c-xlatamat huanti nalipahuán. ⁷ Xlipacs huantu huixín maclacasquinátit, Dios aya camaxquínitán laquimpí akstítum nalatapayátit xlimakua kalhkalhitiyátit yuma quilhtamacú acxni namimpalay xlimaktuy Quimpuchinacan Jesucristo. ⁸ Quintlatican Dios ankalhín nacamaktayayán laquimpí nitú nalitamakuastayayátit huantu nitlán, chu laquimpí akstítum nalatapayátit, chu nì çatum tí caticálimamāxanín pala tú acxni namimpalay Quimpuchinacan Jesucristo. ⁹ Xlicana pì calipahuántit sampi huantu Dios malacnuy pacs makantaxtíñ, pus huá chú Quintlatican Dios luhua man calacsacnitán laquimpí huá natapaksiniyátit, chu caxanilihuayá acxtum natalatapayátit xCam Jesucristo, huanti Quimpuchinacán.

Pablo huan pì nì catapapitzikolh huanti lipahuankoy Jesús

¹⁰ Natalanín, c-xtucuhuini Quimpuchinacan Jesucristo quit ccalisquiniyán litlán pì aktuma talacapastacni cakalhítit, chu nì caj catapapitzítit, huata acxtum calapaxquítit, calalakahamántit xtachuná lantla tí xlicana acxtum tapaksikoy. ¹¹ Hua chuná ccalihuaniyán sampi makapitzín xlinatalan Cloé quilítakalhchihuinanankonit pì nì xmakasni lamakasitzitahuilayátit c-milakstipancán. ¹² Sampi

quihuanicán pì makapitzín huanti huixín tatamacxtupikoyátit kalhtum malulokkoy acxni huankoy: “Quit huá ctapaksiniy Pablo”; makapitzín huampalakoy: “Huá quit ctapaksiniy Apolos”; makapitzín huampalakoy: “Quit huá ctapaksiniy Pedro.”

¹³ Bueno, ípá chalñuhua Cristo laquimpí nahuanahu pì chalñuhua huanti naquincamaakaputaxtiyán? ¿Usuchí quimpakaxtokohuacaca quit c-cruz laquimpí nacxokonán xpalacata mintalakalhincán? Usuchí acxni takmunútít, ípá c-quintucuhuini takmununitántit? ¹⁴ Cana cpxcatcatziniy Dios pì nití luhua cakmununit c-milakstipancán, caj xman hua Crispo, chu Gayo. ¹⁵ Pus huá xpalacata, ccalihuaniyán pì nití lay nahuán pì quit cakmununit laquimpí nalitlancán pì quit quintapaksiniy. ¹⁶ Masqui xlicana pì na cakmunukonit huanti xala c-xchic Estéfanas, huampi nialh clacapastaca pala huí tí cakmununit atanu. ¹⁷ Pus Cristo nì huá quililacsacnit pì caj nacakmununán, huata huá quililácsacñi laquimpí naclichihuinan yuma akaputáxtut huantu Dios lilakmaxtuputunkoy xlipacs tachixcuhuítat, huampi acxni huá clichiuhinán, nì nacliquilhpacxa huantu caj liacstaca tachihuín laquimpí nì naclimaactujuy xlitlihuaka akaputáxtut, huampi huantu nì tuhua tachihuín naccalimaakataksniyán lantla nilh quimpalacatacán Jesucristo c-cruz.

Cristo kalhiy xlitlihuaka, chu xiskalala Dios

¹⁸ Yamá huanti lipaxuhakoy huantu maaktzankanán, xlacán puhuanakoy pì nitú litaxtuy masqui Jesús nilh c-cruz laquimpí nalakmaxtunán; huampi xlipacs quin huanti lakmaxtuputunahu quilistacnacán, catziyahu pì huantu Jesús akspulanit c-cruz xlicana huá xtalulóktat, chu huá xlitlihuaka Dios

tu naquincalilakmaxtuyán. ¹⁹ Sampi xlicana la huan Dios c-Likalhtahuaka:

“Quit naclactlahuanikoy
xtastacacán huanti akskalalan
chixcuhuín,
chu nitú cactilimáxtulh
xtalacapistacnicán huanti
puhuan koy pi lipequa tu
catzikoy.”

²⁰ Caj lanchú caquihuanitit: yuma akskalalan chixcuhuín, chu lactlanca makalhtahuakananín, xahua huanti pacs lakapaskoy caxatucagua lactlanca talacapistacni anán catuxáhuat, ipá huá maktayakonit laquimpi nalakapaskoy, usu nalipahuankoy Dios? Xlicana pi ni chuná, sampi Dios maktumá masiyunit pi tamá xliakskalalacán xtachuná la xlituntujcán quilitaxtunikonit.

²¹ Cumu Dios kalhiy tlanca liakskalala, xlá ni lacásquilh pi caj xtalacapistacnican akskalalan chixcuhuín huanti unú xala catuxáhuat nalilakapascán xtalacapistacni, huata huá limacámilh xtachihuín laquimpi huá nalilakmaxtukoy xlipacs huanti nalipahuankoy, masqui xlicana pi huá yuma tachihuín huantu mastay laktáxtut puhuan koy pi nitú xlakasi xlipacs yuma huanti naliaktzankatayakoy.

²² Yamá huanti judíos ni canajlakoy sampi xlacán pulana ucxilhputunkoy aktum tlanca licacni xtatlau Dios laquimpi nalipahuankoy, chu huanti ni judíos ni canajlakoy sampi caj tzucukoy tamalacastuckoy xliakskalalacán yuma tachihuín a ver lapí maacchaníy yuma tlanca tastácat huantu putzakoy laquimpi chú na nacanjlakoy. ²³ Pus huá xpalacata, acxni quin liakchihiunanahu chatum Cristo huanti xtokohuacaca c-cruz caj quimpalacatacán, judíos tzucukoy liaklihuuatnankoy, sitzikoy, chu huankoy pi huá yumá caj lixcajnit talacapistacni; chu yumá

huanti ni judíos, acxni kaxmatkoy quintachihuincán, xlacán nitú liucxilh koy sampi limaxtukoy xtachuná la xtalacapistacni ti akuitikonit chixcuhuín. ²⁴ Huampi xlipacs quin huanti Dios quincalacsacnitán pi naquincalakmaxtuyán, chuná la judíos na chuná la huanti ni judíos, stalanca catziyahu pi yuma Cristo huanti quin lichihuinanahu luhua kalhiy xlakasi huantu xlá makantaxtinít c-cruz, sampi antá masiyuma Dios tlanca xlitlihuaka, chu xtastácat. ²⁵ Sampi yuma xtalacapistacni Dios huá lantla quincalakmaxtuputunán, masqui c-xlacatinan luhua tachixcuhuítat tasiyuy pi nitú xlakasi, huampi huata huá tlak xalihua cá kalhiy xlakasi ni xahua pacs lactlanca xtalacapistacnican akskalalan chixcuhuín xala catuxáhuat. Chu lapí huí ti puhuán pi Dios ni xlicana kalhiy litlihuaka sampi makniça Jesús c-cruz, pus lacatancs ccahuaniyán pi Dios makatlajakoy xlipacs litlihuaka huantu anán catuxáhuat. ²⁶ Natalanín, calacapistáctit lantla Dios calacsacnitán laquimpi naclakmaxtuyán masqui luhua huixín huanti ni akskalalan huá lantla puhuancán unú catuxáhuat, luhua huixín huanti ni kalhiyátit litlihuaka, chu na ni kalhiyátit limapaksín, chuna litum ni luhua huixín lactalipahu milinatalancán. ²⁷ Huampi huantu tláhuah Dios, luhua chuna lacsackonit huanti catuxáhuat puhuancán pi luhua lactuntusnu laquimpi tlan namamaxanikoy yuma chixcuhuín huanti luhua akskalalan limaxtukocán, chu laquimpi tlan namamaxanikoy huanti limaxtucán la ti tlak laktlihuakán, xlá lacsackonit huanti ni pala tzinú laktlihuakán limaxtukocán unú catuxáhuat. ²⁸ Dios lacsackonit nalakmaxtukoy huanti ni lactalipahu, yuma huanti ni ucxilhputunkocán

unú catuxáhuat sámpí nitú kalhikoy, laquimpí chuná tlan namasiyuy lantla nī xlicana lactalipahu yuma chixcuhuín huantí puhuancán pī luhua lactalipahu unú catuxáhuat. ²⁹Laquimpí chuná nī lay tī nalilacapacxa c-xlacin Dios pī xlá tlak lihuacá kalhiy xlakasi nī xahua amakapitzín. ³⁰Huampi caj lantla Dios quincalakalhamanán xlá lakxtum quincatlalahuán Cristo Jesús, chu nā luhua chuná lacasquín pī caj xpalacata Cristo nalakapasahu xlipacs xtalacapastacni, chu lantla akstítum nalatamayahu xtachuná lantla xlicana xlakskatán, xahuachí nā caj xpalacata xalaktaxtun quincalimáxtún xtachuná la tī nialh tú lenahu c-xlacin. ³¹Pus luhua quincamininiyán pī quilacán natlahuayahu yuma tachihuín huantu tihua Dios huá chú tú tatzoknít c-Likalhtahuaka antani chuná huan: “Huá pala tī caj luhua xacstu talipahu litaxtuputún, huata xatlán lihuana calacapástacli huantu Quimpuchinacán tlahanit c-xlatámat.”

**Nitú atipatu tú liakchihuínamputún
Pablo, huata xman huá lantla
quincapalacanín Cristo**

2 Natalanín, acxni quit ccaquilaklachán laquimpí naccalítakalhchihuínanán huantu nī xcatziyátit tancs xtalacapastacni Dios, nitú clacsachtuma huantu lacsuan tachihuín, usu pala ccalítakalhchihuínán lactlanca talacapastacni huantu tuhua naakataksátit. ²Sámpí caj xman huá lihuana ccalítakalhchihuínán xatí tamá Jesús, chu xatú xpalacata linínit c-cruz, pus nitú atipatu ccalítakalhchihuínán sámpí caj xman huá xaclacasquín lihuana caakatáktit. ³Acxni quit ccalakchán, xacmakcatzima xtachuná lampala nī xackalhiy litlihuaka, hasta xachlipima caj lantla xacquilhpuhuán pala xamaktum nī tancs

naccatakalhchihuínanán. ⁴Chu acxni chú ccalítakalhchihuínán xtachihuín Dios, nī huá xacmaclacasquín lactlan tachihuín laquimpí naccchihuínán la chatum acstaca chixcú laquimpí naccamaakataksniyán, pus huata huá Dios, chu xlitlihuaka Espiritu Santo camakataksnín pī xlicana huá xtalulóktat huantu quit xaccalítakalhchihuínamán. ⁵Chuná ctláhuah laquimpí mintacanajlacán nī huá xtalacapastacnican chixcuhuín nalimápalhiyátit, huampi huá Dios camaktayamán, chu masiyuma xlitlihuaka c-milatamatcán laquimpí nacanajlaniyátit.

**Xespíritu Dios masiyuy huantu
xamakán tzeq xuí xtalacapastacni**

⁶Masqui xlicana pī acxni ccalíakalhchihuínankoyahu huantí aya lihuana lipahuankonit Quimpuchinacan Jesús, clítakalhchihuínanahu lactlanca talacapastacni. Huampi yuma talacapastacni huantu quin cmasiyuyahu, nī quit clacsactunít quilíakskalala, nā nī pala huá xliakskalalacan yuma huantí lactalipahu litaxtukoy, chu mapaksinankoy unú catuxáhuat, sámpí yuma nī makas quilhtamacú natalakspukoy xliakskalalacán. ⁷Huata huá quit clíchihuínán huá yuma talacapastacni tú tzeq xmaquinít Dios hasta acxni nī xamalacatzuquiy catuxáhuat, huampi calanchú quilhtamacú quin quincamacatzinínitán laquimpí naccatziyahu lantla xlaclhcanit natlahuay laquimpí nā naquincatakalihiyán yuma tlanca xcacni huantu xlá kalhiy. ⁸Yama tlanca mapaksinanín huantí lanchú puxcunankoy, chu mapaksinankoy, niucxni xakatakskonit huantu Dios tzeq lachcahuilínit natlahuay, sámpí pala xtiakatakskolh

yuma tzeḱ xtalacapastacni, nī xtipakaxtokohuácalh c-cruz Quimpuchinacán huantī tlanca xlatatzúcut, chū xcacni. ⁹Huampi tancs lantla tatzoktahuilanit c-Likalhtahuaka antanī chuná huan:

“Xlipacs yuma huantī paxcatcatzīnikoy Dios lantla xlá lakalhamankonit, lhuḥuā tū Dios likalhīma namaxquikoy, huantu nī pala chastum auctilha, na nī pala akaxmata, chū nī pala tzinú xlacapastacnit pala tlan pacs kantaxtuy.”

¹⁰Huampi hua Espíritu Santo quincalīmacatzīnimán Dios yuma tzeḱ xtalacapastacni, sampi hua cspiritu Dios pacs lakapasa xtalacapastacni, hasta masqui huantu puhuancán pī nī lay akataḱscán.

¹¹Cumu la huixín catziyátit, nī pala tí tlan catziy xatú ya tapuhuán kalhiy c-xnacú aḱatūm chixcú, huampi caj xman hua xacstu quispíritu, usu quintalacapastacni catziy xatú ya tapuhuán ckalhiy. Pus na chuná chú cspiritu Dios caj xman huá tlan catziy, chū lakapasa xtalacapastacni Dios. ¹²Huampi cumu cspiritu Dios quincatalamán c-quilatamatcán huá quincamaatzīniyán xtalacapastacni, huá xpalacata nīalh chuná lacapastacahu la lacapastakoy huantī xala catuxáhuat nī lakapaskoy Dios, sampi cspiritu Dios quincamaakataḱsniyán, usu quincamalapakasayán acxni pala tú talakalhamán, usu tataquín quincalīlakalhamanítan laquĩmpī napaxcatcatzīniyahū.

¹³Huachá tancs clīchihiuinán yuma talacapastacni, sampi hua cspiritu Dios quīmacatzīnīnit, chū nī huá clīchihiuinán huantu caj quīacstu quintapuhuán. Pus huá xpalacata, acxni quit cmasiyuy xtalacapastacni

Dios laquĩmpī naakataḱskoy huantī na talama cspiritu Dios c-xlatamatcán, acxtum tancs cmatlanīy sampi hua cspiritu Dios quimaktayay.

¹⁴Yama huantī nī talama cspiritu Dios c-xlatamat, nī matlanīy huantu malacapastacnínán, sampi xlá puhuán pī nītú xlakasi, xahuachī hasta nī lay akataḱsa, sampi yuma huantu ccaḥuanimán caj xman huá tlan akataḱskoy huantī kalhiy xtalacapastacni cspiritu Dios. ¹⁵Huampi catīhuá huantī līmakaxtakā camalánalḥ cspiritu Dios c-xtalacapastacni, xlá catziy huantu lakatīy, chū huantu nī lakatīy Dios, chū nī pala chatum tí nalīhuanīy, usu tlan namaakataḱsniy pī nī chuná xlá. ¹⁶Sampi c-Likalhtahuaka chuná tatzoknit: “¿Xatī ya chixcú tlan xlakápasli, usu xakáḱslī xtalacapastacni Dios? Chū čtī cahuá tlan nahuanilén huantu xlá natlahuay?” Huampi masqui nī canajlaputu, quin huantī lipahuanahu Quimpuchinacan Cristo hasta luhua lakapasahu huantu xtalacapastacni.

Canajlanín xala c-Corinto xtachuná la lactzū camán huantī nī lay xkatínán

3 Nataḱlanín, acxni ccaḱakalhchihuīnanán nī naj lay ccalīxakatliyán lantla minīnikoy huantī xlicāna talamakó cspiritu Dios c-xlatamatcán sampi huixín chunacú līlapátit yuma latámat huantu lakapaskoy catīhua chixcuhuīn huantī xala catuxáhuat. Huixín xtachuná huantī cajcu lakskatán sampi nī naj līhuana akataḱsnítantit xtalacapastacni Cristo. ²Quit luhua lacatzucū ctzucún caḱakalhchihuīnanán xtachuná la lactzū lakskatán huantī cajcu tzīquīkoy, calīmaḥuicán xtziqūt xtzi, sampi nī naj lay xkatikoy huantu lacpalha līhuat. ³Huá chuná ccalīhuanīyán sampi luhua līpecuá lantla laquīclḥcatzaniyátit, lamakasītziyátit, chū catūhua huantu

nítlan latlahuaníyátit, chū luhua atzinū līhuacá lakatiyátit latapayátit lantla tī xala catuxáhuat nī lakapaskoy Dios.

⁴Sampī acxnī huixín huanátit: “Quit ctapaksiniy Pablo”, chū makapitzín huampalakoy: “Quit huá ctapaksiniy, chū cmacastalama chū ctatayama Apolos”, luhua lacatancs masiyupátit pī nī pala tzinū lakpalipátit milatamatcán.

⁵Sampī pala caj luhua cuintaj natlahuayahu huá lantla huixín huanátit, ítú quit quilakasi laquimpī chuná naquincalichihuinanátit? Usu éxatú ya līlīhuaka kalhiy Apolos pī chuná lichihuinanátit? Luhua xlicana lacatancs ccahuaniyán pī quin caj xlacscujnīn Dios, chū caj xman huacu cmakantaxtinītahū huantū quintcalimapaksnī laquimpī huixín nā nalipahuanátit Quimpuchinacan Jesús. Lantla chatunu chatunu quin cmakantaxtinītahū huantū xquincalimapakscanītān nactlahuayahu: ⁶Quit quilimapaksica cacchanānalh, chū Apolos limapakscica camunuhuīlīlh, huampī xman huá Dios huantī tlan namastacay yuma tachanán c-minacucán. ⁷Antá stalanca tasiyuy pī huantī chanānalh, chū huantī cuintajlāl, nī lay līlacapacxa xtascújut sampī caj xman huá Dios mastacanīt mintacanajlacán. ⁸Xlipacs huantī chanānankolh, chū huantī cuintajlakolh yuma tachanán, acxtum pacs lacscujnīn, huampī Dios namaskahuīkoy lantla minīniy namaskahuīkocán xpalacata xtascujutcán tū tlahuakonīt. ⁹Xlipacs quin huantī clīchihuīnanāhu xtachihuīn Dios, huá clacscujnanimāhu, chū huixín nā huá tapaksiniyátit, sampī lītāxtuyátit xtachuná lā tchachanán antānī quincamāscujumacán, usuchī nā tlan nacalīmaxtucanátit xtachuná lā aktum tlanca chiqui huantū Dios yahua. ¹⁰Yuma xasasti xchic Dios huantū tzucumaca yahua, luhua xtachuná lītāxtuy

lā catlahuacanchá aktum patzaps chiqui, Dios quilīmaxtunīt xtachuná lā xapuxcu tzapsná, cmāpūlhulh, cuīlīlh xtankáxeka, tanū chū amakapitzín huantī makatstácalh c-xkalhni. Huampī cuintaj xlitlahuacán huantī namakatstacay pátzaps pī tancs natlahuakoy yuma tascújut. ¹¹Sampī chū nīalh lay tī catimalacatzuquípā pulactum lītum xtankáxeka yuma tascújut huá lapī nī huatiyá tū malacatzuquīnīt Jesucristo. ¹²Lantla xliīhuā huantī maktlahuamakó yuma chiqui, makapitzín lichiquīnamakó huantū tayaniy xtachuná lantla oro, plata, chū lacuan chíhuix, chū makapitzín lichiquīnamakó huantū nī tayaniy xtachuná lantla quihui, mátluc, chū sákat. ¹³Huampī acxnī namín Jesucristo laquimpī naquincatatlahuayán taxokón, acxnícū chū natasiyuy xanīma tlak tlan tascújut huantū tayaniy, usu huantū nalaclakoy; sampī nalīmapasicán lhcúyat, antacū natasiyuy xatī tlahuanīt tlan xtascújut. ¹⁴Huá lapī chatum lichiquīnalh nahuán huantū tayaniy, chū nī lhcuy, cacatzīlh pī namaklhtinán ttaskahu. ¹⁵Huampī huá lapī tī lichiquīnalh nahuán huantū lhcuy, acxnī chū nalacclcutahuīlakoy huantū xlicscujnīt, luhua makchiya nalaklipuhuán, masqui Dios namaxquiy quilhtamacū caakaputáxtulh xtachuná nalītāxtuy lā tī tzałāxtuy lacatum antānī aclhcutayama chiqui.

¹⁶Xahuachī, épā nī catziyátit pī Dios calīmaxtuyán chatunu xtachuná lā templo antānī nalakataquilhputacán, chū pī nā chuná c-minacucán cahuīlanín cspiritu Dios? ¹⁷Cumu huixín canajlanín xtachuná lītāxtuyátit xchic, usu xtemplo antānī huī Dios, pala tī ya chixcū nalīkamanán yuma templo, usu hasta namaxcajuali, pus Dios man namapatīniy; sampī aktum xtemplo Dios xasantujlani, chū minīniy nacacnīnīnīcán.

¹⁸Niucxnicú luhua caacstutakskahuítit pala tí lā huixín luhua acstaca makcatzicán caj cumu luhua huantu lakapasa unú catuxáhuat. Huanti chuná puhuán luhua mininiy calitáxtulh xtachuná lampala nitú catziy laquimpi chuná xlicana acstaca nalimáxtuy Dios. ¹⁹Sampi tamá xtastacatcan chixcuhuín, Dios nitú liucxilha. Pus c-Likalhtahuaka chuná tatzoknit: “Dios maxquikoy quilhtamacú pi calilacataquinankolh xliacstacacán huanti acstaca limakcatzikocán chixcuhuín laquimpi alistalh man xacstucán nalitamaxanikoy xliacstacacán.” ²⁰Chu alacatum c-Likalhtahuaka chuná huampalay: “Dios stalanca catziy pi nitú xlakasi xliacstacacán chixcuhuín sampi ni macaacchankoy xtalacapastacnicán, chu lakachunín quilhtaxunikoy xlituntujcán.” ²¹Pus huá ccalihuaniyán pi ni pala chatum tlanca calicátzilh pi huá tapaksiniy chatum chixcú caj cumu atzinú lakatiy huantu xlá lichihuínán. Huampi lacatanes cacatítit pi ni pala chatum ti tapaksiniyátit, huata huá catapaksiniyán sampi Dios macaminkonit xlipacs huanti liakchihuínankoy xtachihuín laquimpi huixín namaclacasquinátit. ²²Chuná cumu Pablo, Apolos, Pedro, chu hasta xlipacs huantu anán catuxáhuat, pacs camaxquinitán laquimpi nacatapaksiniyán, nacamaktayakoyán, hasta na chuná xlipacs huantu kalhiyátit unú caquilhtamacú, xahua yuma latámat huantu nakalhiyátit alistalh calín, xlipacs yuma huixín catapaksiniyán laquimpi nacamaktayayán. ²³Huampi clacasquín lihuana nacatziyátit pi huá Cristo tapaksiniyátit, chu nascujnaniyátit xtachuná lā xlá tapaksiniy, chu scujnima Dios.

Huantu luhua xlitakatrankatcan apóstoles

4 Quit ccahuaniyán pi tlan naquincaimacapinátit

pi caj escujnin Cristo huanti quincamacuintajlinítan tascújut lantla tancs namasiyuyahu xtalacapastacni Dios huantu xamakan quilhtamacú tzek xlaclhcahuilinit lantla luhua quincalakmaxtuputunán. ²Pus huixín catziyátit lantla mininiy nalatamay chatum huanti macuintajlicanít aktum tlanca tascújut, lantla tu quincamaxquinitán, pi fuerza akstítum nascuja, chu namakantaxtiy yuma tascújut huantu limapaksinít xmalaná. ³Bueno, ¿pá quit cahuá yuma talipahu scujni huanti xlicana makantaxtima tascújut? Pus ni ccatziy, huampi ni pala tzinú quincuenta huantu huixín quincalimacapinátit, usu huantu quimpuhuanikoy amakapitzín, sampi hasta huatiyá quit ni ccatziy pala ankalhín tlan scujni quit. ⁴Chu masqui quintalacapastacni ni atuyá quimapuhaniy pala ctlahuanit talakalhín huantu naclimaxanán, pus xlicana pi ni lay cmaluloka pi nitú ctlahuanit talakalhín, sampi caj xman huá Dios Quimpuchiná stalanca catziy pala ckalhiy talakalhín. ⁵Huá xpalacata quit ccalihuaniyán pi ni pala chatum ti tzapu caliputzananikótit pala tlan, usu nitlan lantla scujnima Dios. Huata xatlán cakahítit caminkalh Quimpuchinacan Jesús laquimpi huá namakasiyuy huantu xmaaktzekuilikonit amakapitzín, chu natamacaxtukoy c-xacaxkakaná huantu lanchú huí capaklhtutá, chu hasta acxnicú luhua natasiyuy pala xlicana yuma chixcú liscujli huantu Dios limapaksinít, chu na acxni chú namaskahuikocán, huampi lantla mininikoy chatunu namaxquicán xtakahucán.

⁶Natalanín, quit clchihuinanit lantla makapitzín huixín tapaksiniputunátit Apolos caj cumu huá capuxculemán, chu makapitzín huampalayátit pi quit quintapaksiniyátit; huá chuná

ccalihuaniyán laquimpí nacatzíyátit pì nìtlán caj nalacsacmaktayayátit chātum, chū amakapitzín caj nalakmakanaítit, huampi xlicana pì nì chuná huan c-xlīmapaksin Dios. ⁷Sampi caj calacapistáctit, íxatí huix pì atzinu tlak talípahu līmāxtuyán, nì xahuá lantla amakapitzín? Chū íxatú yā tlan talacapistacnì huix kalhiya pala nì huā Dios māxquínitán? Bueno, cumu pala catziya pì huā Dios māxquínitán, ítú chū xpālacata caj līlacataquínana xtachuná lampala caj miacstu mān taksnīta mintalacapistacnì?

⁸Caj lantla quit ccauxilhán, huixín xala c-Corinto, līmāxtucanátit xtachuná la akskalalan chixcuhuín huantì acchán kalhikoy xtalacapistacnicán, hasta māx camakcatzīcanátit xtachuná la chātum talípahu rey, chū nīalh tú līláyátit quintastacyahucán. ¡Luhua tlan xuá pala xlicana huixín xmapaksinántit xtachuná la rey laquimpí xquincamaktaya, chū xquincamāxqui talacasquín xactahuilachahu c-mimpumapaksincán! ⁹Quin apóstoles huantì cīlakchihuinānahu xtachihuín Quimpuchinacán lakachunín chuná cmakcatziyahu pì lampala Dios ahuatá quincāhuilīnitanchán c-xtankán xtachuná la yuma tachín huantì tlajakocanīt c-guerra, chū huantì chū lemākoā antanī namaknikocán, sampi līlhcaōcanīt pì namaknikocán, chū clītaxtuyahu la līlakastán unú cātuxáhuat, chuná c-xlācatīncan ángeles, chū c-xlācatīncan tachixcuhuítat. ¹⁰Quin quincālimacāncanán xtachuná la lactuntusnu caj xpālacata pì nì clīmāxananahu, chū aktum catziyahu pì clācsujnimāhu Cristo, chū huixín calīmāxtucanátit akskalalán sampi caj xman huá tlahuayátit huantū matlanīyátit laquimpí nītí nacāsītzīniyán. Quin nì pala tzinú laktlihuakán

clītaxtuyahu unú cātuxáhuat, huampi huixín luhua lactalípahu lītāxtuyátit; quin luhua līpecua lantla quincālakmakāncanán, huampi huixín luhua calakalhamāncanátit. ¹¹Lhūhuata tapatín cpātīmāhu sampi ankalhín cquilhtzīncsahu, cpātīyahu takalhpūtīt, chū lakachunín hasta nītū quilhakacán huantū naclhakayahu; lhūhua huantì quincāsītzīniyán, chū quincāhuilīnicāncán, xahuachí nì ckalhiyahu quinchicán antanī lacatum nactahuilayahu. ¹²Nītí tú csquinimāhu pala tú, huata clīscujahu quimacāncán laquimpí nacūāyanāhu; acxnī pala tī calāhuá quincālikalhka māncanán quin lacuan tachihuín clīkalhtiayahu. Masqui ankalhín quincālacputzanimacán huantū nītlan hasta quincaputzastālāncanán, huampi quin chunatiyā cpāxuhuanapātīyahu. ¹³Acxnī calāhuá quincāaksāncanán, caj lacatzucū cxakatlikōyahu tachixcuhuítat; xtachuná clītaxtuyahu la palhma nīmā lakmakāncán, usu huantū nīalh tú līlacán, chū chuná quincātlahuacāncán hasta chū. ¹⁴Nī napuhuanátit pala huá chuná ccalītzoknimán yuma carta laquimpí caj naccalīmāmaxaniyán huantū huixín tlahuayátit, huata huá chuná ccalītakalhchihuīnamán laquimpí xtākstītumīlītīt, sampi quit luhua snun ccalakalhamāncán xtachuná la quilakskātān. ¹⁵Huá chuná ccalīhuaniyán sampi masqui xkalhītīt akcāhu mīlh mākalhtahuakāncanán huantì xcalītakalhchihuīnán xtachihuín Cristo, huata caj xman chātum kalhiyátit huantì capulālemán, huantì lītāxtuy xtachuná la mintlātēcn c-xasāstī latāmāt huantū kalhītīt acxnī līpāhuāntīt Jesús. ¹⁶Pus cumu xtachuná la mintlātēcn quit, pus clācasquín pì chuná naucxilhtiyátit lantla clīlāmā quintacānjla laquimpí huixín quilakskātān nā chuná naquinkantīyátit tū ctlahuay.

¹⁷Huampi laquimpi tlak lihuacá naakataksátit, chu lihuana nalitzaksayátit nalatapayátit xtachuná la quit clama, naccamalakachaniyan chatum quimaktayaná huanti clipulhcay cumu la quinkahuasa huanicán Timoteo laquimpi huá nactalistacyahuayán nacahuanian lantla quit clen quilatámat c-xlatatín Dios, chu lantla cmasiyunikoy tachixcuhiútat pi na chuná nalenkoy xlatamat c-xlatatín Dios, acxní cliakchihiuinantlahuán xtachihuín Jesús c-akatunu cachiquín. ¹⁸Quit ccatziy pi makapitzin huixín tlanca catziyátit, luhua talipahu camakcatzicanátit, chu chuná litlahuayátit sampi puhuanátit pi nialh ucxnī cacticalakanchán. ¹⁹Huampi lapī Dios lacasquín nī pala makas quilhtamacú naccalakapaxialhnanán, chu acxnicú chú nacucxilha pala tama chixcuhuín huanti chú tlanca licatzikoy xlicana kalhikoy c-xlatamatcán litlihuaka huantu mat Espíritu Santo maxquikonit. ²⁰Sampi milicatzitcán pi huanti lipahuán Dios nī caj xman antiyá litamakaxtaka pala catziy lacuan tachihuín, chu stlan lichihuínán xtapáksit, huampi antá huí xquilhtzúcut lantla masiyuy c-xlatámat pi kalhiy xlitlihuaka Dios, sampi makantaxtiy. ²¹Huá chuná ccalihuanimán sampi ípá lacasquinátit naccalakanachán laquimpi caj naccalacaquilhniyán, usu lacasquinátit naccalakapaxialhnanán, chu luhua lipaxuhu naccatakalhchihiuinanán xtachuná la quincamán huanti tlahuamakó huantu cli mapaksikoy?

Pablo lichihuínán pi nítlán pala tí xpuscat tlahuanit xtutzi

5 Ccahuaniputunán pi lacaxtum catzimaca pi c-milakstipancán huí chatum huanti mat na lipahuán Cristo, chu lantla makatunu tamactupiyátit ankalhín catatamacxtumiyán, huampi

yuma chixcú xpuscat tlahuanit xtutzi. Ccahuanian pi yuma chixcú tlahuanit tlanca talakalhín huantu nī xlitláhuat, sampi hasta yuma huanti nī lipahuankoy Dios nī chuná lamakó. ²Chanchu masqui catziyátit pi chuná, nī pala tzinú limaxananátit, huata caj lampala lihuacá lilacataquinanátit pi huá huixín huanti luhua catziyátit xtalacapastacni Dios. Luhua camininiyán pi xlipuhuántit caj xpalacata pi nítlán huantu lama c-milakstipancán, chu tama chixcú huanti chuná lama mininiy pi maktum camalakachokótit pi nialh nacatata macxtumín. ³Masqui quit nī antá lacxtum ccatahuilachán xachatumínica, huampi luhua clilipuhuán huantu caakspulamán, huampi camakcatzítit pi lampala xastacná antá ccalakayachán, chu aya lihuana clacapastacni huantu mininiy natlahuanian hu tama chixcú laquimpi nalistactayay. ⁴Xlipacs huixín huanti lipahuanátit Cristo, macxtum calapítit, chu cacatzítit pi antá huilachá nahuán quilistacna, xahuachí nī atuyá capuhántit sampi hua Quimpuchinacan Jesús nacamaxquiyán litlihuaka laquimpi namakantaxtiyátit huantu naccalimapaksian. ⁵Tama chixcú huanti tlahuanit yuma tlanca talakalhín, nialh camaxquítit talacasquín macxtum nacatalayán, huata maktum pi catamacaxtútit, chu cahuanítit pi cumu huá lacscujniputún akskahuiní, pus huá macamaxquípátit laquimpi catlahuánilh huantu tlahuaniputún, chu hasta camalaksputúnilh xmacni laquimpi acxní namimpalay Quimpuchinacán catuxáhuat, huá catziy pala nalakalhamán, chu nalakmaxtuniy xlistacna.

⁶C-milakstipancán tlahuamaca lixcajnit talakalhín huampi masqui chuná huixín nī cuíntaj tlahuayátit,

chu hasta lacataquinanátit. ¿Pá nī catziyátit lantla huan aktum takalhchihuín: “Masqui caj actzu limaxcutin levadura namacanicán xatalakmun harina, lacatzucu fuerza xlipacs xlitlanca caxtalasquítit namaxcutikoy”? ⁷ Huá xpalacata ccalihuaniyán, catamacaxtútít tama chixcú sampi xlá litaxtuy xtachuná la limaxcutín, chu chuná naucxilhkoy amakapitzín lantla xlá kalhiy xalixcajnit xtalacapastacni, chu xlipacs chú huixín calitaxtútít caxtalanchu huantu nítú pasanit limaxcutín, chu litlahuacanit xasasti xatalakmun harina xtachuná la tu huacán acxni taxtuy xapascua takspuntzalín. Chu nī pala caj catilitaxtútít huampi luhua xlicana chuná calimaxtunitán Quimpuchinacan Jesucristo, sampi acxni xlá quincapalacanín c-cruz, litáxtulh xtachuná la xalimaknit xcalhniñu Dios huanti acstutamástalh namaknicán, chu chuná xokónalh xpalacata quintalakalhincán.

⁸ Chuná pi quin quincamininiyán namakantaxtiyahu quimpascuajcán xla takspuntzalín, huampi huantu tlan, chu akstítum, xahuachí caj xman huá nahuayahu yuma caxtalanchu huantu nítú kalhiy limaxcutín, chu akstítum calimapascuajnihu Dios xatachakan quinacucán, chu lakmanahu pacs xalixcajnit talacapastacni huantu xkalhiyahu c-quilatamatcán, sampi hua tamá litaxtuy xamakan levadura.

⁹ Yama quincarta huantu xakasiya cticatizoknín, chu cticamalakachanicán, antá lacatanacs ccalitakalhchihuínán pi nialh catatalakxtupítit yuma chixcuhuín huanti chalhuhua kalhikoy xlacchajancán. ¹⁰ Acxni chuná ccatzoknín, nī ccahuaniputún pala luhua maktum calakmakankótít yuma huanti nī lipahuankoy Dios xtachuná pala huanti kalhanankoy, huanti

chalhuhua kalhikoy xlacchajancán, huanti pacs lakatilacankoy huantu nítú kalhikoy, huanti lakataquilhputakoy huantu caj tatlahuamakxtu xdiosescán; chuná ccahuaniyán sampi hua lapí chuná xmakantaxtiputúntit xlasquinca pi maktum xtapanútít unú catuxáhuat. ¹¹ Huampi huantu quit xaccamaakataksniputunán c-quincarta, pi yuma huanti huankoy pi na lipahuankoy Jesús, huampi chalhuhua kalhikoy xlacchajancán, usu aksaninankoy, usu lakatilacankoy amakapitzín huantu kalhikoy, catuhua lakcatzankoy, xlakataquilhputananín huantu caj tatlahuamakxtu xpuchinacán, xakotnín, usu xakalhananín. Xlipacs huanti chuná lamakó, chu huankoy pi lipahuankoy Jesús, huixín nialh la mintalacán naliucxilhkoyátit, chu hasta nī pala catatalakxtupikótít laquimpi acxtum natahuayankoyátit. ¹²⁻¹³ Xlicana xlá pi quit nī quimininiy nacuanii huantu xlitláhuat chatum huanti nī lipahuán Jesús, sampi xman hua Dios catziy lantla namakalhapaliy xpalacata tu tlahuama; huampi xlipacs quin huanti lipahuanahu Cristo tlan lacatítum lahuaniiyahu huantu quilítlahuatcán, chu lantla quilítlatamatcán. Huá xpalacata ccalihuaniyán pi nī atuyá calipuhuántit, huata xatlán maktum catamacaxtútít tama chixcú huanti tlahuanit lixcajnit talakalhín c-milakstipancán laquimpi nī chuná nalaputunkoy amakapitzín.

Huanti lipahuankoy Jesús xacstucán calaccaxtlahuakolh xaklhuhiutcán

6 Quit nī pala tzinú cmatlaniiy lantla huixín nī pala xmakasni lamalacapuyátit c-xpumapaksincan yuma jueces huanti nī lipahuankoy Dios laquimpi huá nacalaccaxtlahuaniiyán lactzu mintaklhuhiutcán. ² ¿Tu catziyátit

pí yuma ajtiyan quilhtamacú acxni Dios natatlahuakoy cuenta xlipacs tachixcuhuítat tì latamakoniñt nahuán catuxáhuat, huixín huanti xlakskatán huanitántit na namakmakalhapalikoyátit? Lapi Dios calilhcanitán pí huixín namakmakalhapalinanapítit, ítú kalhiyátit milakasicán chú nalalaccaxtlahuaniyátit tama lactzu mintakluhuuítcan huantu ni xmakasni calachinán? ³Xlicana quin huanti lipahuanahu Dios namakmakalhapalikoyahu hasta masqui hua ángeles xala c-akapún. Hua lapi chuná naquitaxtuy, ípá lihuacá chú ni lay laccaxtlahuakoyahu lactzu mintakluhuuítcan xala unú catuxáhuat? ⁴Huá chuná ccalihuaniyán, sampi makapitzín huixín huanti huanátit lipahuanátit Dios, ni xmakasni lamakasitziyátit, chu masqui catziyátit chuná natlahuayátit takosún pinátit talacapuyátit chatum mapaksiná huanti ni pala tzinú lakapasa xlimapaksin Dios laquimpi huá nacalaccaxtlahuaniyán mintakluhuuítcan. ⁵Xlicana pí ni pala tzinú limaxananátit huantu tlahuayátit, ítú anán chatum huanti acxtum catatamacxtumiyán huanti makaacchán xtalacapastacni laquimpi huá nacalaccaxtlahuaniyán mintakluhuuítcan? ⁶Tlan xuá pala huatiyá pí tú tzinú xlalimakalipuhuántit, chu aya tlan, huampi huata huá acxtum linatalán lamalacapuyátit c-xlalatincan mapaksinanín huanti ni lipahuanakoy Dios.

⁷Caj xpalacata pí ankalhiná lamakasitzihuilátit luhua mákat aktzankatayanitántit, ni xpalacata hua pala caj lamakasitziyátit, huampi hua tuncán lamalacapuyátit. ítúhuan ni caj lipaxuhuanalipinátit acxni pala tú nitlán catlahuanicanátit, usu acxni pala tú caakskahuimaklhticanátit? ⁸Huampi

huixiná tì acxtum lipahuanátit Jesús ni tzinú lamatzankananiputunátit, sampi nitú lapaxuhuanalipinátit, man laakskahuipiyátit, chu lhuhua huantu nitlán latlahuaniyátit. ⁹⁻¹⁰ítú catziyátit pí huanti ni lakpaliputunkoy xalixcajnit xtalacapastacnicán ni tzinú mininikoy namaklhtinankoy huantu Dios malacunit namaxquikoy xlakskatán antá c-xtapáksit tú huí c-akapún? Pus nialh catakskahuitapátit, sampi c-xlalatín Dios niucxnicú catichankolh yuma huanti xpuchinacán tlahuakoy, chu lakataquilhpatakoy huantu caj xatatlahuamakxtu, na chuná huanti xakatlikoy atanuj puscat masqui huí xpuscat, na chuná yuma huanti lalakatikoy, chu latatalakxtumikoy acxtum chixcuhún, usu na chuná huanti chuná lalakatikoy acxtum lacchaján, na chuná huanti lakatiy kalhanán, na ni pala huanti catuhua lakcatzalacaniy huantu kalhikoy atanuj chixcú, na ni pala huanti tihuanatá kachipulakoy, ni pala aksaninanín, chu xlipacs yuma huanti akskahuimaklhtikoy huantu kalhikoy amakapitzín. ¹¹Masqui xlicana huixín xapulaná na chuná xlapátit, huampi chú caj xpalacata pí Quimpuchinacan Jesucristo cachekemakanín xlipacs mintalakalhincan; Dios camatzankananín mintalakalhincán, chu calimaxtún xtachuná la tì nitú lacleñ c-xlalatín, laquimpi xman huá natapaksiniyátit, chu laquimpi chuná Espíritu Santo nacatalatamayán c-milamatacán, laquimpi huantu akstitum nalatapayátit.

Xlicana pí tlan natlahuayahu huantu puhuanahu huampi ni pacs quincamaktayayán

¹²Huixín catziyátit pí makapitzín chuná huankoy: “Lapi cpuhuán pí Dios ni quilihuanima, pus quit tlan naclahuay pacs lantla chá huantu

quit cpuhuán.” Xlicana xlá pi chuná, huampi ni pacs quincamininiyán tlahuayahu huantu lacasquinahu. Quit pacs clikalhiy tiji nactlahuay tu cpuhuán, huampi ni cactimástal talacasquin pi huantu clakatiy ctilahuay namakatlayay quintalacapastacni, chu alístal naquilimáxtuy xtachuná la xtachín. ¹³ Huilapá aktum tachihuín huantu chuná huan: “Huá lianán quilihuatcán laquimpi nalikasa quimpokocán, chu quimpokocán huá quincalimaxquicanítan laquimpi nalaxkatiy quilihuatcán.” Xlicana xlá pi chuná, huampi acxni quin naniyahu Dios lacxtum namalaksputukoy sampi nialh catimaclicasquihu. Huampi na ccahuaniputunán pi masqui Dios quincamaxquinitán yuma tipalhuahua huantu huí c-quimacnicán laquimpi namaclacasquinahu, ni napuhuanátit pala huá quincamaxquicán makapitzi tu huí c-quimacnicán laquimpi caj nalitlahuayahu huantu lixcajnit talakalhín, huampi Dios huá litláhualh yuma quimacni laquimpi natapaksiniy Quimpuchinacán Jesús, chu xlá latamaputún c-quilichatuminicacán. ¹⁴ Chu acxni naniyahu, nakalhiyahu tanuj quimacnicán sampi Dios kalhiy tlanca litlihuaka, chu xtachuná lantla xlá malakastakuánilh Quimpuchinacan Jesucristo calinín, na chuná naquincamalakastakuaniyán.

¹⁵ Xlipacs quin huanti lipahuanahu Cristo, masqui quilhuahacán aya acxtum tahuanitahu Cristo, chu pacs quin lantla quinchatuminacacán litaxtuyahu xtachuná la caj chatum. ¿Pá quimininiy cahuá chú pi yuma quintiyatlíhua huantu tapaksiniy Cristo, caj xman naclitlahuay talakalhín, chú nactatalakxtumiy chatum puscát huanti caj xalakahuiti? iXlicana pi ni lakchán! ¹⁶ Sampi acxni chatum chixcú tatalakxtumiy chatum xalakahuiti puscát, masqui luhua xchatuyacán

lampala chatumá litaxtukoy. Chuná tatzoknit c-Likalhtahuaka lacatum antani chuná huan xpalacatacán huanti tapuchuhuakoy: “Masqui xchatuyacán xuankonit, litaxtukoy xtachuná lampala mana huatiya aktum tiyatlihua huankonit.” ¹⁷ Huampi acxni chatum macamaxquiy xlatámat Quimpuchinacan Jesús, xlicana pi Jesús, chu yuma cristiano chatumá litaxtukoy c-xlistacna.

¹⁸ Ni catalacatzuhuiníitit huanti camatlahuiputunán talakalhín masqui xlicana pi ni pala chatum anán huanti ni tlahuama talakalhín, huampi ni anán talakalhín huantu maxcajuałiniy xtiyatlihua chatum chixcú xtachuná lantla acxni tatalakxtumiy chatum puscát huanti xalakahuiti. ¹⁹ Niucxni tipatzankatayátit pi hua quintiyatlíhuacán Dios limáxtuy xtemplo Espíritu Santo huantu xlá quincamaxquinitán laquimpi antá xputáhuilh natlahuay, huá xpalacata quilatamacán nialh quin mapaksiyahu. ²⁰ Cumu Dios luhua tapalaxlá quincalimalaktaxtín, huá chú tapaksiniyahu, huachá quincalimininiyán xachatuminica nalicacninaniyahu.

Pala tí tapuchuhuaputún, pus catapuchúhualh

7 Huixín quintitzoknitit mactum carta antani quinkalhasquínitit lapí tlan, usu nitlán tapuchuhuacán. Quit naccahuanianyán huantu clacapastaca, lapí chatum chixcú makcatziy pi tlan nalatamay masqui nití xpuscát, pus ni catapuchúhualh. ² Huampi huá xpalacata pi lacxtum huilakó yuma lakahuitinin lacchaján huanti caj chatum chatum xakatlikoy chixcuhuín, huata laquimpi nití natlahuay talakalhín, xatlán chatunu chixcuhuín cakalhikolh chatunu xpuscátcán, chu na chuná lacchaján cakalhikolh

chätunü xchixcucán. ³Xlipacs huixín huantí tapuchuhuayátit, huá chixcú camáxquilh xpuscat huantu maclacasquín xtiyatlihua, chu na chuná puscát camáxquilh xchixcú huantu maclacasquín xtiyatlihua.

⁴Chuná ccahuaniyán sampi huantí tatapuchuhuay chatum puscát nialh huá xacstu mapaksiy xtiyatlihua, huampi huá tapaksiniy xchixcú, na chuná chixcú nialh huá xacstu mapaksiy xtiyatlihua huampi huá tapaksiniy xpuscat. ⁵Huixín huantí puchuhuayátit, acxtum calamáxquítit huantu kalhiyátit, chu huantu maclacasquín mintiyatlihuacán, huampi lapi acxtum licatziyátit pi ni catitalakxtupítit cana caj ni limakas quilhtamacú, laquimpi atzinú tlan natlahuayátit mioracioncán ni anán tasokalín, pus tlan pi chuná natlahuayátit, huampi acxni nalakchán quilhtamacú lantla lilhcanitántit, catalakxtupipalátit laquimpi ni nalitlahuayátit talakalhín mintiyatlihuacán, chicá pala tanu huantí naxakatliputunátit.

⁶Xlipacs yuma huantu ccahuaniyán, ni huá luhua ccalimapaksimán, huampi pala ti puhuán pi tapuchuhuaputún, pus catapuchúhualh. ⁷Huampi huantu quit quintalacapastacni, tlan xuá pi xlipacs chixcuhuín ni xtapuchuhuakolh lantla quit, huampi huata Dios xlixla chätunu chätunu quincamáxquinitán tanuj tanu xlatámat.

⁸Quit cpuhuán pi xlipacs lakkahuasán, chu lactzumaján huantí ni atapuchuhuakoy, na chuná huantí yuma lacchaján huantí nimakankocani, xalihua tlan naquixtunikoy c-xlatamatcán pala chunatiyá nalatamakoy masqui ni catapuchuhuakolh txachuná lantla quit. ⁹Huampi lapi puhuanátit pi ni lay latapayátit miacstucán, pus xatlán catapuchuhuátit, chu nitlán quitxtuy pala caj chalipuhuana

nalatapayátit caj xpalacata cumu nití huantí tatapaksiyátit. ¹⁰Chinchu huixín huantí aya tapuchuhuaniántit, ccamaxquiyán yuma limapaksín, masqui xlicana ccahuaniyán pi ni quilimapaksín huampi huá xlá Quimpuchinacan Jesús, pi chatum puscát niucxnicú camakáxtakli xchixcú. ¹¹Chí lapi xamaktum namakaxtaká xchixcú, chunata akstitum calatámalh, chu nialh catatapuchúhualh atanuj chixcú; huampi lapi makcatziy pi ni lay latamay xacstu, pus catalaccáxlalh xchixcú, chu catatahuilapá. Chu na chuná chatum chixcú, niucxnicú camakáxtakli xpuscat. ¹²Yuma tachihuín huantu naccahuaniyán ni huá xlimapaksín Dios, huampi caj quiacstu quintalacapastacni, pi lapi chatum chixcú huantí lipahuán Jesús tahuí chatum puscát huantí ni xlipahuán Jesús, huampi lapi matlaníy lantla latahui, luhua mininikoy pi chunatiyá calatatahui, chu ni calamakáxtakli. ¹³Na chuna litum lapi chatum puscát huantí lipahuán Jesús tahuí chatum chixcú huantí ni lipahuán Jesús, huampi lapi matlaníy lantla latahui pus ni calamakaxtakolh, chu chunatiyá akstitum calatatahui. ¹⁴Sampi masqui yuma chixcú ni lipahuán Jesús quitxtuy pi huá na maxquiy cācni Dios, chu tlahuay xtalacasquín caj xpalacata cumu akstitum talama xpuscat. Chu na chuná yuma puscát huantí ni lipahuán Jesús, quitxtuy pi na huá maxquiy cācni caj xpalacata cumu akstitum tahuí xchixcú. Pala ni chuná xquitáxtulh, pus xlipacs xlakskatacán ni xtapaksinikolh Dios sampi nití xlitakalhchihuínankolh, huampi lapi ni nalamakaxtakoy, pus tlan natapaksinikoy Dios. ¹⁵Huampi lapi chatum chixcú, usu chatum puscát huantí ni lipahuán Jesús luhua fuerza huan pi calamakáxtakli, pus tlan maktum calamakáxtakli, sampi Dios lacasquín pi quin akstitum calatamahu.

¹⁶ Huá chuná ccalihuanianyán sampi, ñlantla ñicatzia huix chixcú huá lapí tlan namakataksniya mimpuscat pì nalipahuán Jesús caj cumu lakatiya nalatatahuilayátit? Usu ñlantla ñicatzia huix puscat huá lapí tlan namatlaniya laquimpì nalipahuán Jesús mintakolú caj cumu nì nalamakaxtakátit?

¹⁷ Xlipacs yuma huanti aya lipahuankoy Jesús lantla c-akatunu cachiqún, ñlitalalhchihuinanankoy pì chunatá lantla huix xkalhiya milatámat acxnì Dios tasanín nalipahuana Jesús, chunatá calalhi, chü nì calakmákanti, capaxuhuanapati sampi pacs huá Dios chuná lhcanit quilatamatcán quincamapitzininítan chatunu. ¹⁸ Huá lapí chatum chixcú circuncidar lanit c-xtiyatlíhua chuná lantla lismanikoni xlipacs judíos, alístalh chú lipahua Jesús, pus nì caxapaxtupútlul huantu kalhiy c-xtiyatlíhua; na chuná lapí chatum chixcú huanti nì circuncidar lanit acxnì tasánilh Dios, pus nì xafuerza alístalh circuncidar nalaputún. ¹⁹ Sampi nì huá limakapaxuhuayahu Dios pala tasiyuy c-quimacnicán pì circuncidar lanitahu, usu nì circuncidar lanitahu, huata huá luhua limakapaxuhuayahu pì makantaxtiyahu c-quilatamatcán xlimapaksín. ²⁰ Masqui caxatucahua latámat, usu tascújut xkalhiyahu chatunu chatunu acxnì lipahuahu Jesús, nì tuncán calakmakamputuhu, huata chapaxuhuañ calilatamachahu. ²¹ Hua lapí acxnì huix lipáhuanti Jesús xtamahuacanita, chü xmascujupaca xtachuná la tachín, nì calilipuhuantit lapí nì lay laktaxtuya laquimpì ñialh nascujniya huanti xtamahuantán, huampi lapí xamaktum namakaxtakcana, pus nì camamakapali quilhtamacú, huata tuncán tlan catlahua. ²² Chuná ccahuaniyán laquimpì lihuana naakataksátit, chü nacatziyátit pì chatum chixcú masqui

xtamahuacanit, chü xmascujumaca la xatachín scujni acxnì lipahua Jesús, chú quítaxtuy pì lampala calakuán lama, sampi lakmaxtunít Quimpuchinacán laquimpì nascujniy, chü na chuna litum xlipacs yuma huanti nì xtastakoni xlamakó acxnì lipahuankolh Jesús, chú xlacán tapaksinikoy Cristo xtachuná la xatatamahuan scujni. ²³ Cumu Dios luhua tapalaxlá lantla caxokoxtunítan laquimpì huá natapaksiniyátit, huá xpalacata ñialh pala tzinú caminiyán namaxquiyátit talacasquín mintalacapastacnicán pì chuná namaktlahuayátit talakalhín xtachuná la tlahuakoy catíhua chixcuhuin.

²⁴ Chatunú huixín natalanín, ccahuaniyán pì nì atuyá capuhuantit, huixín chunatá calatapátit c-xlacatín Dios xtachuná la xlakayátit latámat acxnì huacu lipahuántit Jesús, chü nitú luhua fuerza calakpaliputúntit sampi masqui catuyahuá latámat, usu tascújut pacs tlan nalimaxquiyátit cacni Dios.

²⁵ C-mincartajcán huixín na quinkalhasquinítantit lantla luhua mininikoy nalatamakoy huanti caju lakkahuasán, chü lactzumaján, huá lapí tlan, usu nitlan natapuchuhuakoy. Huantu quit naccahuaniyán nì huá Dios quilimapaksinít, huampi cumu huixín catziyátit pì quilakalhamanít, chü quimaxquinít Dios tastácat lantla tlan tastacyahu naccamaxquiyán, huata naccalitalalhchihuinanán quintalacapastacni, sampi cpuhuán pì max chuná lakchán. ²⁶ Quit cpuhuán pì chatum kahuasa huanti tapuchuhuaputún, luhua atzinu tlan xquítaxtúnilh chunatiyá xlatámalh lantla lama, masqui nì xtapuchúhualh, sampi xlicana luhua tuhua, chü lipecua quilhtamacú lantla lamahu chú. ²⁷ Huampi nì cuanimán huix huanti huijá mimpuscat pì camakáxtakti mimpuscat, huata ccahuaniputunán pì chatum kahuasa

huantı nı naj kalhiy xpuscat, pus tlak tlan nı tuncán capútzh. ²⁸Huampi lapı çatum kahuasa natapuchuhuy, xlicana pi luhua tlan sampı nı tlahuay talakalhın; na chuná huá lapı çatum tzumát tapuchuhuy, tlan huantu tlahuay, sampı nı tlahuay talakalhın. Huampi ccahuaniputunán pi xlipacs huantı tapuchuhukoy luhua talakapútzit lakchinkoy, chu quit nı clacasquín pala huixín na luhua caj xman huá nalıtaklhuhiyátit.

²⁹Natalanín, chuná ccahuanıyán sampı clacasquín nacatziyátit pi nıalh luhua makas quilhtamacú quincatzankaniyán lantla natiliscujahu Quimpuchinacán, pus mininikoy xlipacs huantı aya tapuchuhukonıt, pi luhua akstıtum caliscujkolh xtachihuın Dios hasta lantla tlan tayanikoy xtachuná pala nı cakálhilh xmahuınacán, usu xchixcucán.

³⁰Laquimpı akstıtum naliscujátit xtachihuın Dios, yumá huantı kalhiy tlanca talıpuhuán c-xlatámat, capatzánkalh xtalıpuhuán, chu chapaxuhua caliscujli xtachuná pala nı cakálhilh huantu namakalıpuhuán; chınchu huantı luhua kalhiy huantu nalıpaxuhuy c-xlatámat, capatzánkalh xtapaxuhuan, chu huantı lakatiy catuhuá natamahuy huantu lacsuán, xtachuná pala nı xlá calımáxtulh. ³¹Chu xlipacs huantı luhua kalhıkoy unú catuxáhuat huantu stlan nalıpaxuhukoy, huata chuná calatamakolh xtachuná lantla ti nı luhua nalakcatzankoy, usu nalılipuhuanıy pala namakatzankakoy huantu lipaxuhumakó, pus milıcatzıtcán pi xlipacs huantu lanchú ucxılıahu unú catuxáhuat, nı lay ankahlın nalıpaxuhuyahu sampı namın quilhtamacú acxnı pacs nalakspıta.

³²Huá chuná ccalıhuaniyán sampı nı clacasquín cıta

catuhuá nalıtakatzankatapayátit c-milatamatcán, sampı çatum kahuasa huantı nı atapuchuhuy, chu xacstu lama, xman huá litakatzankay lantla akstıtum nalıpuhuán, chu namakapaxuhuy Dios. ³³Huampi acxnı chú aya tapuchuhuanıt, caj luhua xman huá limakuaniy litakatzankay huantu anán unú catuxáhuat, chu lantla luhua namakapaxuhuy xpuscat. ³⁴Na chuná çatum tzumát huantı nı atapuchuhuy, nı anán tasokalı nı lantla xlipacs quilhtamacú caj luhua xman huá nalıtakatzankay lantla nalıscuja xla Dios, chu lantla akstıtum namacamaxquıy Dios xlatámat, laquimpı akstıtum chú xlá pacs xachatuminıca namaclacasquín, huampi yuma tzumát huantı aya tapuchuhuanıt, caj luhua xman huá limakuaniy litakatzankay tu xala catuxáhuat lantla nacuintajtlahuay xlakskatán, chu xchixcú. ³⁵Nıtú napuhuanátit pala luhua ccalımapaksımán pi nıalh natapuchuhuyátit, huata huá quit ccalıtakalhchihuınamán huantu atzinú nacamaktayayán c-milatamatcán laquimpı nıtú nacasokalıyán lantla luhua akstıtum, chu xlipacs minacucán nalıscujniyátit Quimpuchinacán.

³⁶Huá lapı huı kahuasa squinınanı, acchaná xcıta, chu puhuán pi huá fuerza natatapuchuhuy xtasquín, lapı luhua man puhuán pi huá tlak minıniy tlahuay, pus tlan catapuchúhualh, sampı nı tlahuay talakalhın caj xpalacata pi natapuchuhuy, huata chuná catláhualh lantla xlá puhuán.

³⁷Chu lapı çatum kahuasa huı xtasquín, huampi xlá luhua aktum catziy pi nı tapuchuhuputún sampı luhua caj xacstu latamaputún, pus tlan calatámalh xacstu, masqui nı catapuchúhualh, chu nı tlahuay talakalhın. ³⁸Yumá quıtaxtuy pi lapı çatum kahuasa huantı squinınanı aktum catziy pi natatapuchuhuy

xtasquín, pus xlicana pi tlan huantu tlahuay cumu tapuchuhuay, huampi lapí xamaktum luhua aktum catziy pi ní tapuchuhuaputún, pus luhua lihuacá tlan quitaxtuniy pi ní natapuchuhuay.

³⁹Chatum puscát huanti puchuhuay, xlicana pi luhua caj xman huá tapaksiniy xchixcú xlimakuá lamajcú catuxáhuat, huampi lapí xamaktum nanimakancán, yuma puscát quitaxtuy pi nialh tí mapaksiy, chu tlan natapuchuhuapalay lapí xlá chuná lacasquín, huampi catatapuchúhualh chatum huanti nalipahuán Jesús. ⁴⁰Huampi quit cpuhuán pi atzinú lipaxuhu xlatámalh chatum puscát huanti nimakancanít huá pala pi chunatiyá xlatámalh, chu nialh xtapuchúhualh, quit chuná ccalitakalhchihuinanán quintalacapastacni sampi huá cspiritu Dios quimapuahuaniy.

**Ni tlan huacán líhuat
huantu liçaxtlahuānicananít
tū caj tatlahuamakxtu**

8 Huá chú huilapá pulactum tachiuhín huantu huixín quinkalhasquimpátit xpalacata huá lapí tlan, usu nítlan huacán líhuat huantu liçaxtlahuānicanán tū caj tatlahuamakxtu. Xlicana lá huixín huanátit pi chatunu lantlá lama hu pacs kalhiyahu talacapastacni, chu tastácat laquimpí lihuana naakatakshu pi tama tatlahuamakxtu nítú xlakasi. Huampi yuma quintastacacán huantu kalhiyahu lakachunín litlancacatziyahu, chu lactalipahu quincalimakcatzicanán, huampi huata huanti xlicana kalhiny tapáxquit, chuná limaktayalenikoy xtaçanajlacán huanti acu tzucukonít lipahuankoy Jesús, chu ní naj chuná akatakskoy. ²Huá lapí huí tí puhuán pi pacs catziy huantu xlitláhuat, chu nialh lacasquín pala tí nahuaníy tū natlahuay, cacátzilh pi huí atipatum

tlán talacapastacni tū ní naj catziy.

³Huampi pala tí luhua xlicana lipahuán, chu paxquié Dios, ná chuná Dios luhua lihuana maluloká c-xlatámát pi tamá xlicana tlahuama huantu makapaxuhuay.

⁴Huampi chujcú naccahuaniyán huantu huixín quinkalhasquimpátit. Cumu lá huixín stalanca catziyátit pi aktum tatlahuamakxtu ídolo nítú kalhiy xlakasi unú catuxáhuat, sampi caj xman chatum Dios xastacná lama, chu nítí anán atanú. ⁵Chu masqui catuxáhuat, xahuá c-akapún luhua xanankolh yuma huanti tachixcuhuítat limaxtukoy xtachuná lá xdioscán, chu xpuchinacán tlahuakoy, xlicana pi yumá nítú xlakasi kalhikoy. ⁶Huampi quin stalanca catziyahu pi caj xman chatum huí huanti Quintlatican Dios lama xastacná, huanti malacatzuquikonít xlipacs huantu anán, huanti caj xman huá tapaksiniyahu. Chu xman huá chatum huí xastacna Quimpuchinacan Jesucristo huanti maktlahuanié xlipacs huantu anán, chu caj xpalacata xlitlihuaká makcatzi lila mahucú.

⁷Huampi ní xlipacs huanti aya lipahuankoy Jesús lihuana akatakskoy huantu cçahuanimán, sampi luhua huanti xamakán xlatamatcán xlismanikonít xlakataquilhputakoy xatatlahuamakxtu xtachuná lá xastacna xpuchinacán. Acxni chú huakoy yuma líhuat huantu liçaxtlahuānancanít, luhua atuyá puhuankoy pi nítlan huantu tlahuamakó, sampi yuma ídolo chunacú limaxtukoy xtachuná lá chatum dios huanti ní xlitlakataquilhputacán. Chu pi ní naj akstítum kalhikoy xtalacapastacni, ní naj akatakskonít pi tama ídolo nítú xlakasi, sampi ní stacnán, huata puhuankoy pi acxni huakoy yuma líhuat lixcajualakoy c-xlatamatcán. ⁸Milicatzitcán pi Dios ní huá lacuan chixcuhuín naquincalimaxtuyán caj xpalacata huantu lihuayanahu, usu

ní lîhuayanáhu, sámpî acxtum lîtaxtuy c-xlacatín caj pala huaputuná catuhua lîhuat, usu pala caj lacsaca huantú nahuaya, chû huantú ní huaputuna.

⁹Huámpî masqui chuná, xlipacs huixín huantí catziyátit pí pacs tlán caxatucahuá lîhuat nahuayátit, sámpî ní lîtlahuayátit talákalhín, pus luhua cuñtaj catlahuátit pí nítú luhua calakuán namasiyuyátit laquimpî yuma huantí acu tzucunít lipahuán Quimpuchinacán ní nalîmalacatijîniya xpalacata huantú tlahuayátit, chû xlacán nalîtlahuakoy talákalhín pala nahuakoy yuma lîhuat. ¹⁰Huixín huantí catziyátit pí caxatucahuá lîhuat pacs tlán, chû lapî xamaktum napîná antanî huilînicanít lîhuat, chû nalîhuayana yuma lîhuat huantú aya lîcaxtlahuananicanít, chû lapî ucxilhmán çatum huantí acu tzucunít lipahuán Cristo, xalán napuhuán pí ná tlán, chû naakpuhuanitîy nahuay yuma lîhuat. ¹¹Tamá quintalacán tlahuámaj nahuán talákalhín sámpî ní luhua xlipacs xtapuhuán huama, chû huix maaktzankápat nahuán çatum huantí ná palacanínî Cristo c-cruz. ¹²Chû acxnî huixín atuyá mapuhuanîkoyátit c-xtacanajlacán yuma huantí xljaua xtacanajlacán, chû macastalakoyán huantú tlahuayátit, usu huay huantú ná huayátit, pus huá Cristo maklakalhipátit. ¹³Huá chuná quit ccalîhuaniyán: lapî caj xpalacata quilîhuat huantú clihuayán cliîactlahuanikoy xtacanajlacán amakapitzín huantí ná lipahuamputún Cristo, chû atuyá cmapuhuanîkoy, xatlán nahuán pí nialh ucxnî cactîhualh lîhua laquimpî naclactlahuayahuanikoy xtacanajlacán amakapitzín quintacanjalanín.

**Pablo lîscujma huantú
Jesús lîmapaksinít**

9 Quit tlán ccalîmapaksiyán huantú huixín milîtlahuatcán,

sámpî huá man quintasiyunínî Jesús, chû quilakmaxtunínî huantú xquinkalhiy lá xtachín, laquimpî xman huá nactapaksinîy, chû naquihuaniy tú quilîtláhuat, ná quilîmaxtunít xapóstol, usu xtalakachán laquimpî canîhuá nacán lichihuínán; chû huixín tlán malulokátit pí xlicana cmaîkantaxtîma yuma tascújut tú xquimaxquínî, sámpî huixín aya lipahuanátit Jesús caj cumu quit tancs ccalîtalalhchihuinanítán. ²Masqui makapitzín ní canajlakoy pala quit luhua quilacsacnít Jesús laquimpî xapóstol nacuán, chû naclîchihuínán xtachihuín, huámpî huixín tlán malulokátit sámpî stalanca catziyátit pí pacs quimpalacata masqui chû lipahuanátit Jesús, chû chuná stalanca tasiyuy laquimpî pacs naucxilhkoy pí xlicana quit xapóstol.

³Quit chuná ckalhtîpaxtokkoy xlipacs yuma huantí quiaksankoy, quilakmakankoy, chû ní quilîmacankoy lá apóstol: ⁴¿A poco ní lakchán caj chunatá naquintahuayankoy xlipacs huantí quit aya cliîtalalhchihuínankonítahu xtachihuín Cristo? ⁵¿Pá ní cliîkalhiy tîji cahuá nackalhiy çatum quimpuscat huantí acxtum naclatatapaksiyahu, chû nactaanáhu canîhuá, xtachuná lantlá kalhîkoy xpuscatcán amakapitzín apóstoles, chû xnatalán Quimpuchinacán, chû Pedro? Xlicana pí ná chuná quilîtláhuat, huámpî huata quit ní chuná ctlahuama. ⁶Quit, chû Bernabé ní quincaminîniyán nacmakscujahu laquimpî natasiyutîlhay huantú nacuayahu, huámpî huixín stalanca catziyátit pí ní chuná ctlahuama. ⁷¿A poco pala çatum chixcú an maksuja lîtropa namakatzankay huantú huatiya xacstu xtumín nalîhuayán, chû nalîlhakanán? Ná chuna lîtum huantí chan xáhuat, ¿lantlá pí man lîscuja, chû ní huay xatlaktla, usu lîhuayán xacuxi? Chû lapî

chatum chixcú kalhiy lhuahua huácax, chu pacs makchitkoy, ¿a poco ni huay xaleche? ⁸Chu huixín nítu tipuhuanátit pala caj xman huá clacsacxtuma huantu quiacstu cpuhuama xpalacata pi xlipacs huantu naliscuja chatum chixcú huá luhua nalihuayán, sampi hasta c-xlimapaksin Moisés huantu títzokli, na chuná limapaksinán, ⁹sampi c-aktum xlimapaksin chuná huan: “Ni tiqinkachiya tama mintakalhín huantu mascujúpat malacpajápat mintrigo, huata camaxqui talacasquin pi cahuáyalh.” Huampi ni napuhuanátit pi yuma xtachihuín huamputún pi Dios caj luhua xman huá litakatzankay yuma takalhín huantu mascujukocán acxni chuná limapaksinán. ¹⁰Ni chuná, sampi quin huanti luhua quincalitatatzankayán. Chuná ccahuaniyán sampi yuma xlimapaksin Dios quincamaxquicanitán laquimpi naquincamaktayayán xlipacs quin huanti tlahuamahu pala tú tascújut. Sampi na chuná quin la yuma takalhín huantu malakuaxnicán tiyat antani nachananancán, usu yuma takalhín huantu matiyicán huantu aya namakalacán cuxi, acxtum quincamininiyán napuhuanahu pi cana caj acatzunín naquincamahucanán yuma tamakalán huantu makiiscujmahu. ¹¹Hua palapi hua quin cchanitahu c-minacucán huantu camaktayanitán lakapasátit Dios, ¿tú quincamininiyán pi huixín naquincalimaktayayátit cana acatzunín huantu xala unú catuxáhuat nalihuayanahu? ¹²Pus huixín maktayakoyátit amakapitzín huanti calitakalhichihuinanán xtachihuín Dios, ¿tú puhuanátit pi xalihuacá quincamininiyán naquincalimaktayayátit cana actú tu cmaclacasquinahu?

Huampi masqui tlan ccatziyahu pi chuná quincalakchanán,

ni pala maktum caj luhua chunata xaccamaakatzankán pi naquincatahuayanátit pala ni naccaxokoniyán, quin cpaxuhuanalenahu, chu chapaxuhua cmaxcujahu laquimpi ni caj chunata nacmakuayanahu. Chuná tlahuayahu laquimpi ni pala chatum ti naliaklhuuatnán, chu nialh nalipahuán yuma laktáxtut huantu malacnuy Jesús, huantu quin cliakchihuinanahu. ¹³Huixín catziyátit pi xlipacs judíos huanti tlahuakoy xtascujut pali c-tlanca templo xala c-Jerusalén, huá lihuayankoy lihuat huantu mastacán antá, sampi Dios chuná limakaxtakkonit, chu acxni lakataquilhputanán judíos, xlipacs yuma lactzu takalhín huantu antá maknikocán laquimpi nalisahuanicán Dios, xlacán palijni tlan nalihuayankoy. ¹⁴Chu na chuná chú limapaksinani Quimpuchinacan Jesús pi huanti liakchihuinanikoy xtachihuín huá nali tamaktakalhikoy yuma actzu tumín huantu namastakoy huanti nacanajlanikoy xtachihuín. ¹⁵Masqui xlicana ccatziy pi chuná quililtáhuat, quit niucxnicú chuná tlahuama, chu na ni pala huá ccalitzoknimán yuma tachihuín laquimpi chú caquincamaxquítit huantu cmaclacasquima. iHuata cmatlaniy masqui cactzincstamákalh, huampi ni cactimatajinálh xpalacata nacliakchihuinan xtachihuín Dios! ¹⁶Ni napuhuanátit pala caj ctlanccatziy, usu luhua talipahu quimakcatzicán acxni clichihuinan xtachihuín Quimpuchinacan Jesús; huata quit luhua stalanca ccatziy pi xafuerza nacliakchihuinan sampi xla chuná quilimapaksinit. iChanchu koxutá lapí ni xaccliakchihuínal h yuma lipaxuhu xtamacatzinín huantu mastay laktáxtut! ¹⁷Chuná pi lapí caj quiacstu quintapaxuhuan ckalhiy lantla

clìchihuínán xtachihuín Cristo, xlicana quimininiy naquilakalhamancán, chu naquimaxquicán quintataquín; huampi ni huá clitlahuay caj xpalacata naquimaxquicán tatlaja, huampi huá clitlahuay sampi Dios quilimapaksinít xafuerza pi nacmakantaxtiy yuma xtascújut. ¹⁸Quit nitú ctaljama lantla cliakchihuínán yuma lipaxuhu tachihuín tu mastay laktáxtut, huampi hua quintaskahu ctlahuay yuma quintapaxuhuán pi lantla cliakchihuínanikoy tachixuchútat, caj litlán tu ctlahuama, ni pala chatum tí csquinima huantu quit cmaclacasquín masqui xlicana pi chuná quilakchán nactlahuay.

¹⁹Masqui xlicana pi ni pala chatum ti caquintiaktakahuacá c-quintascújut, huampi quit luhua chapaxuhua cliscujkoy caxaticahuá laquimpi pacs nalipahuankoy Jesús. ²⁰Acxni clama c-xlakstipancan judíos huanti lismanikonit makantaxtikoy pacs lactzu lactzu tu limapaksinanit Moisés laquimpi nalilakachixcuhicán Dios, quit na chuná ctlahuay huantu xlacán tlahuakoy laquimpi xlacán naucxilhkoy pi quit ni clakmakankoy, chu chuná atzinu lhuhua huanti nalipahuankoy Jesús; masqui xlicana pi quit ccatziy pi ni luhua fuerza quilimakantáxtit pacs huantu huan xlimapaksin Moisés laquimpi Dios naquimaakaputaxtiy xtachuná lantla xlacán puhuankoy.

²¹Chu acxni clama c-xlakstipancan huanti ni judíos, chu ni lismanikonit makantaxtikoy xlimapaksin Moisés, quit na chuná clitzaksay ctlahuay huantu xlacán lismanikonit tlahuakoy laquimpi nacatzikoy pi clakalhamankoy, chu chuná atzinu lhuhua huanti nalipahuankoy Jesús, masqui xlicana pi quit ankahlín huá ctlahuay xtalacasquin Dios sampi huá cstalanima xlimapaksin Cristo. ²²Acxni clama c-xlakstipancán huanti acu

tzucukonit lipahuankoy Cristo, chu ni naj akstitum kalhikoy xtacanjalcán, quit cmasiyunikoy pi quilá ctlahuay xtaxlajuanicán laquimpi chuná tlan lihuana naakatakskoy huantu naclitakalhchihuínankoy. Caxanichuá cán, quit chuná clatamay lantla xlacán lismanikonit chatum chatum laquimpi chuná huí ti naquinkaxmatniputunkoy acxni naclixakatlikoy Cristo, chu nalipahuankoy. ²³Na hua yumá chuná ctlahuay laquimpi tlan nacmacatzinikoy xlipacs tachixcuhútat pi Cristo acxtum lakmaxtuputunkoy, chu na chuná chú quit acxtum nactapaxuhakoy huanti nalipahuankoy.

²⁴Huixín catziyátit pi acxni latlajakoy lakkahuasán, aver xatí tlak palha kosnán, luhua lhuhua huanti kosnankoy pi na tlajanamputunkoy, huampi caj xman chatum huanti tayaniy, chu nalakchán trofeo; pus na chuná chú huixín calitaxtútít, acxtum cacosnántit pi natayaniyátit c-milatamatcán, chu namaklhtinanátit mintataquincán huantu nacamaxquicanátit. ²⁵Yama lakkahuasán huanti huanikocanít pi nalatlajakoy, pala xatí tlak palha kosnán, laquimpi natayanikoy, lhuhua huanti limakaxtakkoy, ni tlahuakoy, usu ni huakoy huantu maxlajuanikoy c-xtiyatlihuacán, masqui xlacán luhua stalanca catzikoy pi caj actzu trofeo xla licán, usu akatzu xánat namaxquikocán pala natlajanán, chu ni makas quilhtamacú xnaka, chu laclakoy; huampi quin catziyahu pi niucxni catilákspuati yuma huantu Cristo naquincalimaskahuiyán pala ni taxlajuaniyahu, lipahuanahu, chu liscujniyahu xtachihuín. ²⁶Caj huantu quit quimpalacata ccatziy lantla ckosnama, chu tancs ccatziy xaní cchama c-quilatámat, nitú caj akuiti ckosnama, usu akuiti ctatlancanima, huata tancs ccatziy lantla nacchán.

²⁷Huá xpalacata, luhua fuerza ctlahuaniy ckosnán masqui xlicana pi aya tlakuanit quimacni, laquimpi ni nactatlayji, chu ni ahuatá nactayayachá, quit huanti cmasiyunikolh amakapitzin lantla akstitum nalatamakoy, chu nalipahuankoy Cristo c-xlatamatcán.

**Dios ni lacasquin
nalakataquilhputayahu caj
xatatlahuamakxtu dioses**

10 Natalanin, nitú tipatzankayátit pi xalakmakán quinatlatnacán judíos, Dios macaminikolh aktum puchni antani xlacán xtijitlahuamakó acxni xtalamakó, laquimpi pacs nacatzikoy pi xmaktakalmakó; chu caj xpalacata pi xlá xmaktayamakó, tlan patacutkolh yuma takayahuaná huantu huanicán Mar Rojo. ²Cumu hua Moisés xpuxcunanikonit xlipacs huanti akmilij tlahuakolh yuma puchni, chu huanti patacutkolh yuma takayahuaná, quitaxtuy pi Dios chuná xlimalulokma pi chú xlá xliankalhiná xpuxcucán nalitaxtuy caxanicaahuá ni napulalenkoy yuma puchni. ³Pacs pulactumá lihuat xlihuayankoy huantu Dios maxquikolh acxni xlapulakoy c-desierto. ⁴Chu acxni xkalhputikoy, acxtum xli kotnankoy yuma chúchut huantu Dios maxquikoy, sampi xlicana pi hua Cristo ankalhin xtalapulakoy canihua, chu na huá xlitaxtuy yuma tlanca chíhuix antani xtatumachi chúchut. ⁵Huampi masqui Dios luhua xlakalhamankoy, luhua judíos ni paxcatcatzinikolh huantu xlá xtlahuay xpalacatacán, chu huantu maxquikoy, huata huantu nitlan tlahuakolh, huá xpalacata Dios limakaxtakolh pi akahuan calacnitamakolh anta yuma c-tlanca desierto.

⁶Xlipacs huantu xlacán akspulakolh quin tlan lilacahuananahu pi nitú timacastalayahu, chu ni nalakatiyahu natlahuayahu huantu nitlan xtachuná

lantla xlacán tzucukolh tlahuakoy huantu ni xlitlahuatacán xuanit.

⁷Chu na nitú tilakataquilhputayahu catuhua tu caj tatlahuamakxtu hua lantla xlacán makapitzin chuná tilakataquilhputakochá, sampi chuná tatzoknit c-Likalhtahuaka: “Yama israelitas tzucukolh huayankoy, chu kotkoy caj xpalacata chuná nalimaxquikoy caxni xatatlahuamakxtu xdioscán.” ⁸Ni capuhuántit natlahuayátit huantu lixcanjit talakalhin xtachuná lantla xlacán titlahuakochá acxni makapitzin chixcuhin, chu lacchaján acxtum lalimakapaxuhuakolh xmacnicán; huampi Dios mapatinikolh, chu aktuma quilhtamacú nikolh lihuacá puxamatutu mil xlacán huanti chuná tlahuakolh. ⁹Xahuachí niucxni cahuántit pala nitlan huantu camaxquiyán Dios, ni casquintit pi fuerza nacatlahuaniyan huantu lakatiyátit catláhualh huantu ni pala tzinú camininiyan, ni calacataquitit xtachuná lantla xlacán titlahuakochá, na hua Dios limacaminikolh luhua xalucuj luhua huantu xcakolh, chu luhua nikolh. ¹⁰Na chuna litum ni caaklhuatnántit nahuaniyátit Dios pi xlá ni camaxquiyán xlipacs huantu huixin maclacasquinátit xtachuná lantla xlacán tilahuanikochá, na hua Dios limacamilh chatum ángel, chu maknikolh huanti caj xtatlancanikoy.

¹¹Xlipacs huantu akspulakonitanchá xalakmakán quinatlatnacán judíos, lihuana tzokuilicanit c-Likalhtahuaka laquimpi naquincamaktayayan, chu acxni nalikalhtahuakayahu quin huanti lamahu calanchu quilhtamacú nacatziyahu pi ni chuná quililacataquinatcán hua lantla xlacán lacataquinankolh, chu tlahuakolh huantu ni lakatilh Dios. ¹²Huá xpalacata, calihuaniyan pi huanti litlanacatziputún pi akstitum lama,

chü nialh lay toklhä taläkalhín, pus luhua cuintaj catláhuah pi nā nī xalān natamakuastayay xtāchunā lantla tamakuastayakolh makapitzin xlacán. ¹³Xahuachí, milicatzitcán pi acxnī nacalakchinán pala tú tasokalín, niucxnī nacalakchinán huantu nī lay talayátit. Huampi calipahuántit Dios, chü capaxuhuátit sampi xlicana pi xlá nacamakstayayán laquimpī huixín natayaniyátit masqui caxatucagua tuhua tasokalín nacamamakuasiputunán.

¹⁴Natalanín, quit luhua ccalakalhamanán, chü cumu quit nī clacasquín pi nacatoklhcanátit, luhua ccalijmaakatzankayán pi nī natalacatzuhuiniyátit antānī lakataquilhputacán huantu pi caj xatatlhuamakxtu, nī luhua huā Dios. ¹⁵Chunā tancs ccalixakatliyán sampi ccatziy pi xaacchán kalhiyátit mintalacapastacnicán, chü tlan nahuanátit pala tlan, usu nītlán huantu ccalistacyahuamán. ¹⁶Calacapastáctit lantla acxnī tamakstokahu laquimpī lakxtum nahuayahu acatzunín yuma xatachitni uva, alīstalh acxnī squininiñahu Dios nasiculanañlahuay, cumu huā lītuxtuy xkalhni Cristo tū huamahu, xlicana pi chunā acxtum lītahuanahu c-xlinín. Nā chuna lītum acxnī lakchakayahu caxtalanchü, alīstalh acxnī paxcatcatzininiñahu Dios, cumu huā lītuxtuy xtiyatlihua tū huamahu, xlicana pi chunā acxtum lītahuanahu c-xtapatín. ¹⁷Sampi masqui xlicana pi luhua quilhuhacán huanti lipahuanahu Cristo, huampi chatumá lītuxtuyahu, sampi mactumá caxtalanchü tū huamahu acxnī chunā līlakataquilhputayahu Dios. ¹⁸Huixín nā luhua cuintaj catlahuátit huantu tlahuakoy judíjs acxnī lakchán xpascuajcán xla takspuntzalín, xlacán maknikoy tantum takalhín laquimpī nalīshuanikoy Dios, chü alīstalh acxnī macxtum huakoy yuma lihua pus,

čtū xtāchunā macxtumá tahuanátit c-xtalakataquilhputancán? ¹⁹Caj xpalacata huantu quit clichihuināma, nī napuhuanátit pi tamá huantu caj tatlahuamakxtu ídolo, chü tamá lihua huantu līcaxtlahuānancán, kalhikoy lītlihuakā naquincalākahlīniyán c-quilatamatcán. Nī huā cuaniputún sampi aktum ídolo nī stacnán, chü yuma lihua huantu līshuanicán, caj chunata lihua xtāchunā lantla catuhua lihua. ²⁰Huampi acxnī chatum huanti nī lipahuán Dios makniy xtakalhín laquimpī nalīshuanīy ídolo, masqui xlá nī catziy pi chunā tlahuama, xlicana pi huā akskahuinī lakataquilhputay, huā xpalacata ccalihuanīyán pi nī camaktanukótit huanti chunā lamakó. ²¹Huixín huanti aya lipahuanátit Jesús, nītū tilīkamananátit Dios pala ucu nalīkotnanátit xatachitni uva huantu līlakataquilhputayahu Dios, chü nā nalīkotnanátit huantu līcaxtlahuānānicaniñ akskahuinī. Nā tlahuayátit talākahlín pala ucu nahuayátit caxtalanchü huantu līlakataquilhputayahu Dios, chü nā nalīmakuayampalayátit yuma līhuat huantu līcaxtlahuānānicaniñ ídolo.

²²Pala tī chunā tlahuamahu, čpā tlan cahuā līkamán maxtuputunahu Dios, usu caj lacataquimahu? Cuintaj catlahuátit pala chunā, sampi čpā atziní quin tlak kalhiyah lītlihuakā nī xahua xlá laquimpī tlan makasitziiputunahu?

**Nītū titlahuayahu huantu
nalactlahuayahuanikoy
xtacanajlacañ amakapitzin**

²³Xlicana yuma tachihuín huantu huancán pi chatum pacs līkalhiy tiji natlahuay caxatucagua huantu napuhuan. Xlicana pi chunā, huampi nī pacs huantu tlahuayahu quincaminīniyán, usu acxtum quincamaktayayán c-quintacanajlacán. ²⁴Huā xpalacata ccalihuanīyán,

ní caj xman huá caputzátit
natlahuayátit huantu huixín tlak
nalipaxuhuayátit, huata huá caputzátit
lantla tlan namakapaxuhuayátit,
chu namaktayakoyátit amakapitzin
natalanín.

²⁵Xlipacs lihua huantu stacán
cpumaknin lapí pimpátit tamahuayátit,
pus ní cakalhasquininántit hua
lapí lisahuanicanit ídolo, usu nitú
lisahuanicanit, huatiyá pí quilhpaxtum
catamahuátit, chu cahuátit. ²⁶Sampi
xlipacs huantu anán catuxáhuat
Dios pacs tlahuakonit laqeimpi
namaclacasquinhu.

²⁷Huá pala pí chatum chixcú huanti
ní lipahuán Dios kalhiy tapaxuhuán
calemán pí nacatahuayanán
c-xchic, calakachixcuhuítit, pus
capítit, chu quilhpaxtum cahuátit
huantu nacamujunicanítit, ní atuyá
capuhuántit, chu ní cakalhasquininántit
lapí lisahuanicanit ídolo yuma líhuat
huantu tahuapacántit. ²⁸Huampi
lapí chatum huanti antá lacxtum
tahuayamán nahuanianyá pí tama
líhuat licaxtlahuananicanit ídolo,
pus ní cahuat laquimpi ní atuyá
namapuhuaníya yuma huanti
malacatanccsanín, sampi xlá çanajlay
pí talakalhín lapí nahuakoy tí
lipahuankoy Dios. ²⁹Xlicana pí huixín
ní atuyá nalipuhuanátit lapí nahuayátit
tama lihua sampi tancs catziyátit
pí ní talakalhín, huampi huata
luhua cuintaj milítlahuatcán pí ní
nalítlactlahuayahuakoyátit amakapitzín
huanti ní chuná catzikoy caj xpalacata
huantu tlahuayátit.

Huampi max huí tí puhuamā:
“¿Túhuan chá quit quilíhuanicán tú
clíkalhiy tíji nactlahuay, caj xpalacata
huí tí nalíaklhuatnán? ³⁰Lapí
cmaxquiy paxcatcatzínit Dios xpalacata
tú cuay, ¿túhuan quilíchihiuankoy
amakapitzín xpalacata tú cuay?”

³¹Huampi quit ccahuaniyán pí acxni

pala tú nahuayátit, usu nakotátit,
chu catúhuá huantu lactzu lactzu
tlahuayátit, xapulh milílacapastácat
pala chuná nalímaxquiya cacni
Dios. ³²Huá ccalíhuaniyán niucxni
nalímakaxtakátit pí caj xpalacata
huantu huixín natlahuayátit pala
tí nalímalacatiijiniyátit, usu atuyá
nalímapuhuaníyátit c-xtacanajla,
masqui huanti judíos, usu huanti ní
judíos, xalihucá huanti tapaksinikoy
c-siculán antani lakataquilhpuyátit
Dios. ³³Quit ní huata chuná ctzaksay
clatamay lá tlan nactlahuay tú
cacstulakatiy, huata ankalhín ctzaksama
nahuán lantla tlak tlan nactmaktayakoy
amakapitzín c-quilatámat, sampi
clakcatzankoy, chu clacasquín pí
naakaputaxtukoy.

11 Huá xpalacata ccalíhuaniyán,
huixín huá caucxilhtítit lantla
quit clama, xtachuná lantla quit
cucxilhtíma, chu ctlahuama lantla
tilatámah Quimpuchinacan Jesús.

Luhua xlasquinca xuanit pí nataktlapakoy lacchaján antani macxtum lakataquilhpuyacán Dios

²Quit luhua cpaxuhuay pí huixín
quilacapastacátit, chu luhua akstítum
lapátit c-milatamatcán xtachuná
lantla quit ccamasiyunitaquin.

³Huampi huí tipatú huantu clacasquín
naakataksátit, pí xtachuná lantla
Dios mapaksiy Cristo, chu Cristo
huá mapaksiyoy xlipacs chixcuhuín,
na chuná chatunu chixcú mapaksiy
xpuscat. ⁴Huá xpalacata límaxaná
quitaxtuy lapí chatum chixcú ní
takxtunán acxni tlahuay oración, usu
acxni liakchihiuán xtachihiuín Dios,
sampi masíyuma pí mataxtuca, chu
hasta akapulay huanti xpuchiná. ⁵Na
chuná quitaxtuy chatum puscat acxni
tlahuay oración, usu liakchihiuán
xtachihiuín Dios, lapí ní taktlapay acxni
chuná chihuínama, pus quitaxtuy pí

nī xlicānā cācnīnaniy xchixcú huānti mapaksiy. Tamā puscāt xtāchunā xalīmaxanā quitaxtuniy xtāchunatā pala aksitpuxtucanīt. ⁶Huāmpi lapī chātum puscāt nī taktlapaputún acxni lakataquilhputay Dios, pus huata xatlān maktum catāksitli. Chī lapī līmaxanā namakcatziy pī maktum naaksitpuxtucān, pus catlāhualh huāntu xlā xlitlāhuat, caj xman catāktlāpalh acxni lakataquilhputanān. ⁷Chātum chixcú nī minīniy nataktlapay acxni tlahuay xoración, sāmipi xlā huā mapaksinān, chū masiyuy lantlā kalhiy Dios xlacatzúcut. Huāmpi puscāt, caj xman huā xlā lakchān namasiyuy pī huā chixcú mapaksinān. ⁸Calacapastāctit lantlā xamakan quilhtamacú Dios malacatzúquīlh Adán, chū c-xmacni Adán Dios malacatzuquípā Eva.

⁹Nī huā chixcú āhuatā tlahuacanīt laquīmpi natalamaktayay c-xlatāmāt puscāt, huāmpi huā puscāt āhuatā tlahuacā laquīmpi natalamaktayay, chū natalatamay yumā chixcu Adán huānti aya xlamajā. ¹⁰Pus huā xpalacata, chātum puscāt xafuerza nataktlapay acxni lakataquilhputay Dios c-siculán, laquīmpi chunā stalanca namasiyuy pī xlā cācnīnaniy xchixcú huānti mapaksiy, chū xlipacs ángeles luhua nalipaxuhuakoy. ¹¹Huāmpi masqui chunā niucxni tipatzankayātīt pī c-xlacatīn Dios, lā chixcú, chū lā puscāt acxtum lamaclacasquinkoy.

¹²Masqui xlicānā pī yumā Eva xapulh puscāt, huā līmalacatzuquīnīt xtapalucut Adán, pus nā luhua xlicānā pī lantlā caxatīcahuā antā lacachinkoy c-xlatamātcan lacchājān, huāmpi luhua lacxtum, lā chixcú, lā puscāt, pacs huā malacatzuquīkonīt Dios.

¹³Pus hasta man chū huixín caquihuanātīt huā lapī minīniy natlahuay oración chātum puscāt masqui nī nataktlapay. ¹⁴Huāmpi quit cphuān pī nītlān tasiyuy, chū līmaxanā

pala chātum chixcú malacstacay, chū lachlmān kalhiy xacchixit. ¹⁵Huāmpi huata luhua tlan tasiyuy chātum puscāt huā lapī lachlmān xacchixit, sāmipi luhua chuna tuncān līmaxquicanīt xacchixit laquīmpi lachlmān nastaca, chū tlan naliaktlapay xakxēka. ¹⁶Huāmpi lapī huī tī nī chunā puhuān, chū nī namatlāniy huāntu quit ccalītakalhchihuīnamān, pus quit nīalh quincuenta, chū nī lay cacticalaccaxtlahuān sāmipi xlipacs huānti clipahuanahu Jesús lantlā canīhua cāchiquīn, aya clīsmānīntahu pī acxni chātum puscāt nalakataquilhputay Dios xafuerza nataktlapay.

**Pablo nī matlāniy lantlā
kamanantaxtukoy acxni
tamacxtumīkoy c-siculán**

¹⁷Huāmpi huīlapā tanuj tachihuīn huāntu naccāhuanīyān sāmipi nī cmatlāniy, aya quilītakalhchihuīnanca pī acxni huixín tamacxtupiyātīt laquīmpi nalakataquilhputayātīt Dios, nī camactayayān, huāmpi huata caj līhuacā camāaktzankamān. ¹⁸Huancān pī acxni huixín tamacxtupiyātīt c-siculán, mat tzucuyātīt aklīhuatnanātīt, chū tamputuy taxtuyātīt, quit ccanajlay tzinū huāntu huancān. ¹⁹Sāmipi ccalakapasān lantlā mintayātīn, chū māx huā tamputuy lītaxtuputunātīt laquīmpi lantlā līpecua naaklīhuatnanātīt, chunā tlan natasiyuy xatī luhua xlicānā lakapaskoy xtaluloktat Dios, chū luhua xlicānā lipāhuankoy. ²⁰Huāmpi huāntu quitaxtumā xpalacata huāntu huixín lītapapitziyātīt, acxni tamacxtupiyātīt laquīmpi macxtum nahuayanātīt xtāchunā lantlā Cristo yumā xaahuatīyā quilhtamacú tāhuayankolh xapóstoles, huixín nīalh chunā tlahuayātīt. ²¹Quihuanicān pī acxni aya macxtum nahuayanātīt,

makapitzín lacapalā tzucukoy macapulakoy, chū līhuayankoy huantū man̄ liminkonit̄ xtahuaýcán, xlimakuá amakapitzín huantī tlak laklimaxkanín chunatā lacahuantahuilakoy nīalh tú maktaxtukoy tahuay, huí tī hasta tlan̄ līkachikoy huantū man̄ liminkonit̄ xcuchucán. ²²Huixín huantī chuná tlahuayátit, ¿a poco nī kalhiyátit minchicacán antanī xuayántit, chū hasta masqui xkachítit lapī luhua chuná lakatiyátit? ¿Pá huá chuná lītlahuayátit pala caj nītú līucxilhkoyátit huantī xlakskatan̄ Dios huantī tamakstokkonit̄ laquimpī macxtum nalakataquilhpūtanankoy? ¿Túhuan līmamaxanikoyátit huantī nītú kalhikoy tū maclacasquinkoy? ¿A poco puhuanátit chú pī luhua clakatixnīma huantū huixín tlahuayátit? ¡Luhua lacatancs ccahuaniyán pī nī pala tzinú cmatlaniy!

Huá lantlā masiyunīt Jesús xpālacata nalakataquilhpūtayāhu

(Mateo 26:26-29; Marcos

14:22-25; Lucas 22:14-20)

²³Quit aya ccalitākalhchihuinanitán huantū Quimpuchinacan̄ Jesús man̄ quimasiyuninīt lantlā xlá lacasquín nalakataquilhpūtayátit, huampī naccamalacapastacnīpalayán pī yumā catzīsín acxnī Judas līakskahuínalh, chū macamástalh, xlá macxtum tatahuilakolh kalhacutuy xapóstoles c-mesa laquimpī ahuatá natahuayankoy. Xlá tīyalh mactum caxtalanchu, ²⁴chū acxnī paxcatatzínilh Dios xlíhuat, tilakchákalh, chū chuná huanikolh: “Cahuátit yumā caxtalanchu sampī xlicanā ccahuaniyán pī huá lītaxtuy quintiyatlīhua huantū quit nacmacamastay laquimpī tlan̄ naccalakmaxtuyán. Xaliankalhín chuná catlahuapítit naquilīlacapastacátit.” ²⁵Acxnī chú huayankolh, tīyalh pātum vaso, stap xtajumā xchuchut

uva, chū chuná huanikolh: “Huá yumā xchuchut uva lītaxtuy quinkalhnī huantū nastajtamacán laquimpī xlipacs nacatzicán pī Dios catatlahuanitán aktum xasasti talaccaxlán lantlā nacamaakaputaxtiyán; huixín ankalhín chuná catlahuapítit laquimpī naquilīlacapastacátit.” ²⁶Huá xpālacata, lantlā makatunū macxtum huayátit tamā caxtalanchu, chū macxtum nalīkotnānātīt tamā xchuchut uva, huixín ankalhínā līmacatzinīnampátit nahuán pī Jesús nīlh caj quimpalacatacán, chū xaliankalhín chuná quilītlahuatcán hasta acxnī xlá namimpalay.

Akstītum quilīhuatcán caxtalanchu, chū xchuchut uva huantū līlakataquilhpūtacán Jesús

²⁷Chuná pī caxatīcahuá tī caj xaaklakuá namaktalacatzuhuiy laquimpī namakuay yumā caxtalanchu, chū yumā xchuchut uva huantū lītaxtuy xtiyatlīhua, chū xkalhnī Quimpuchinacan̄ Jesús, xlicanā pī tamā chíxcú tlanca talākalhín tlahuamā c-xlacatīn Quimpuchinacán, sampī līkamán maxtumā huantū maktlhtīnalh. ²⁸Huachá xpālacata, xlipacs huantī namakuaputunkoy tamā caxtalanchu, chū līkotnamputún yumā xchuchut uva, luhua minīnikoy pulh līhuanā calacapastackolh lapī catzīkoy, chū cācnīnanikoy huantū natlahuakoy. ²⁹Sampī huantī caj huá lakahuán nahuay, chū nī maxquiy cācnī pī xlicanā huá xkalhnī Quimpuchinacán lītaxtuy huantū huamā, pus man̄ huamakó huantū nalītamaktlhtumiy c-xlacatīn Dios. ³⁰Pus hasta huá xpālacata pī nī luhua cūntaj tlahuayátit, makapitzín huixín huantī taxlajuaniyátit, max huá lītatatlayátit, chū makapitzín hasta laknikonit̄. ³¹Huampī Dios nī xquincamapatinín lapī quin līhuanā xlacapastacuī acxnī nahuayāhu

tü lītuxtuy xtiyatlihua, chü xkalhni quimpuchinacán, lapí cācninanimahu, chü lakataquilhputayahu. ³²Masqui xlicāna lakachunín xlicasquinca pi naquincalīakastacyahuayán Dios, quin huantī lipahuanahu Jesús, huá chuná lītluhuay sampi quincalalakhamanán, chü nī lacasquín pi quin huá lacxtum natalaktzanktayakoyahu yuma xala catuxáhuat huantī nī lipahuankoy.

³³Natalanín, quit ccahuaniyán pi acxni huixín natamacxtupiyátit laquimpī macxtum nahuayanátit, pi nalacapastacátit lantla quincapalacanín Jesús, pus huantu akstítum, chü lacatzucü catlahuátit, xahuachí calakalhkalhítit laquimpī acxtum nahuayanátit. ³⁴Huampi lapí huí tī catziy pi natzincaschá, pus pulh cahuayantáquilh c-xchic laquimpī Dios nī nacamaxokoniyan caj xpalacata huantu nī tlan tlahuayátit acxni macxtum nalakataquilhputayátit. Caj xman huá cuankay yuma tastacyahu huantu milītluhuatcán, sampi amakapitzín līlaccáxlat huantu kalhiyátit antacú naccalītakalhchihuina nachán acxni naccalakanachán.

Tipakatzi tascújut chatunū quincamaxquiyán Espíritu Santo

12 Natalanín, quit clacasquín pi lihuana naakataksátit xpalacata lantla Espíritu Santo maxquikoy chatunū tanu xtastacacán, usu xtascujutcán huantu nalīmakstayakoy tī lipahuankoy Jesús.

²Huixín catziyátit pi acxni nī xalipahuanátit Jesús, xputzayátit lantla nacamacatziniyán tama caj xatatlhuamakxtu midioscán tü xcatziputunátit, huampi cumu xlacán nī stacnankoy huixín caj xtāskahuitapayátit. ³Huampi lanchú pi aya lipahuanátit Quimpuchinacan Jesús, quit naccahuaniyán lantla tlan nalakapaskoyátit huantī xlicāna

mapuhuanima Espíritu Santo tü nalīchihuínán, chü huantī caj machihuīnima akskahuiní. Huá luhua milīcatzītcan pi nī pala chatum chixcú catimapuhuanīl cspiritu Dios pi chuná nahuán: “Nī pala tzinú tü xlakasi Jesús”, chü natzucuy līkalkhamanán. Nā chuna lītum nī pala chatum chixcú catimalúlokli, chü nahuán: “Jesús huá Quimpuchinacán huantī lama xastacná”, lapí nī huá Espíritu Santo talama c-xlatamat. ⁴Nā luhua milīcatzītcan pi quin huantī lipahuanahu Jesús, masqui quilhuhuacán, xlixla lantla chatunū kalhiyahu tanuj tanu quilīskalalacán, huampi masqui chuná, mana huatiya chatum Espíritu Santo huantī la xtataquín mastay pacs yuma līskalala, usu tascújut. ⁵Masqui xlicāna pi lantla chatunū quin, tīpalhuhua kalhiyahu quintascujutcán, huampi pacs xmana huatiya chatum Quimpuchinacán huantī lacscujnimahu. ⁶Nā chuna lītum lantla chatunū tanuj tanu quincamaxquicanitán lītluhuaka laquimpī līhuua huantu tlan natlahuayahu, huampi chatuma Dios huantī quincamaxpuhuanian laquimpī chuná natlahuayahu. ⁷Dios quincamaxquinitán Espíritu Santo laquimpī, caj xpalacata tama līskalala tü xlixla quincataquiyán, chuná tlan nalalīmakstayayahu chatunū amakapitzín. ⁸Huá tama Espíritu Santo lantla xlixla mastay xtataquín, huantī makapitzín maxquikoy xatlan talacapastacni lantla naakstacachiuhinankoy, chinchu huá makapitzín taquikoy līskalala laquimpī līhuua huantu nacatzikoy, chü nalakapaskoy, huampi huatiya huá aktum Espíritu Santo tī scujma c-quilatamatcán. ⁹Huí tī maxquiy Espíritu Santo tlanca tacanajla laquimpī amakapitzín nauxilhkoy pi Dios mastay pacs

huantü nasquinikoy, chü makapitzín maxquikoy xlitlihuaka laquimpí tlan namapacsakoy caxatücahua tajátat.

¹⁰ Makapitzín maxquikoy litlihuaka laquimpí natlahuakoy lactlanca licacni tatlahu, na makapitzín maxquikoy liskalala laquimpí tlan naakatakskoy, chü tancs nalíakchihuínankoy huantü xtalacapastacni Dios, na tanuj litum chú huantí maxquikoy liskalala laquimpí nacatzikoy xatí xlicana huá macatziniy Dios xtalacapastacni xpalacata nalíchihuínán, chü xatí caj aksanínankoy acxni huankoy pí lichihuínán xtalacapastacni, makapitzín litum maxquikoy liskalala laquimpí nalíchihuínankoy aktum sasti tachihuín huantü nì pala çatum tì akataksa huampi huata caj xman huá Dios, huampi na maxquipalakoy liskalala makapitzín laquimpí namalacaputuncuhuiy huantü huaniputún yuma tü nití lakapasa tanuj tachihuín. ¹¹ Masqui xlicana pí tipalhuhua tascújut huantü çatunu çatunu kalhiyahu, huampi huatiya yuma çatum Espíritu Santo huantí quincamaxquiyán, xlá quincamaakpitziniyán huá xanima lachcanit pí atzinú naquincamininiyán namaclacasquinahu.

Xlipacs huantí lipahuanahu Jesús xtachuná lantla çatumá litaxtuyahu

¹² Huixín catziyátit pí xmacni çatum chixcú, masqui luhua lhuhua lactzu lactzú huantü lilakstoka, mana huatiya xachatumínica, pus na chuná chú quin huantí lipahuanahu Cristo, çatumá litaxtuyahu. ¹³ Masqui xlicana pí quilihuacán, sampi huí tì judíos, chü huí tì nì judíos, makapitzín stakocanit mascumakoca xtachuná la tachín, chü makapitzín nití mapaksikoy, aktziyaj lamakó, huampi cumu acxtum canajlayahu, xlipacs makamaklhtinanitahu huatiya tama

chatum Espíritu Santo huantí macxtum quincatlahuanitán quin quilipacsán, chü xtachuná la aktum xachatumínica macni lihuanitahu.

¹⁴ Sampi xtachuná lantla aya cuanít pí xmacni çatum chixcú, lhuhua lantla lactzu lactzú huantü lilakstoka, chü nì caj pulactumá. ¹⁵ Hua chú lapí pulactum chuná xuá: “Quit nì antá cmaktapaksiy c-xmacni yuma chixcú sampi quit nì macán”, tancs ccahuaniyán pí masqui xlá chuná xuá nì pala huá xlitatánujli, sampi xlicana pí luhua antá maktapaksiy c-xmacni yuma chixcú. ¹⁶ Chí lapí hua takán xuá: “Quit nì antá cmaktapaksiy c-xmacni yuma chixcú sampi quit nì lakastapu”, xlicana pí masqui chuná xuá, nì pala huá chú xlitatánujli. ¹⁷ Catlahuátit xacuenta: Pala xlitlanca xmacni çatum chixcú, pacs lakastapu xuá, nitú xuá huantü xlikáxmatli. Na chuna litum lapí xlitlanca xtiyatlihua çatum chixcú, pacs takán xuá, nitú xuá huantü xliquinkahuánalh. ¹⁸ Huampi Dios xlixla laccaxuilkonit lantla pulacatunu xala quintiyatlihuacán laquimpí namaclacasquinahu, chü antani xlá puhua pí tlak tamaclacasquinkoy. ¹⁹ Sampi lapí lantla quilitlanacán, pacs chatumínica xuá, chü nitú xuá amakapitzí xala c-quintiyatlihuacán, nì lay xlatamahu. ²⁰ Masqui xlicana pí pulacluhua lantla lactzu lactzú huantü lilakstokahu, na luhua pulacluhua huantü limapacuhukocán, huampi lacatumá c-xtiyatlihua yuma chixcú antani maktapaksikoy.

²¹ Sampi xlakastapu çatum chixcú nì lay catihuánilh xmacán: “Quit nitú clilayán”; na nì pala hua akkeka catihuánilh xtantún: “Nì pala tzinú ccamaclacasquinán.”

²² Huampi caj lakapuxtu, yumá huantü lacscalajuán tasiyukoy, atzinú tlak maclacasquinkoyahu. ²³ Lantla pulacatunu huantü kalhiyahu

c-quimacnicán, chu hasta masqui huantu puhuanahu pi nitú xlakasi, huampi acxtum luhua cuintaj tlahuakoyahu; chu yuma huantu puhuanahu pi ni lakatiyahu pi naucxilhcán, usu calakuán natasiyuy, pus lihuana litlapakoyahu quilhakacán. ²⁴Huampi na huilapá makapitzín c-quimacnicán huantu ni lihuana caxyahuakoyahu sampi chuna tuncán tlan tasiyuy. Hua Dios chuná caxtlahuanit quimacnicán laquimpi acxtum maclacasquinahu masqui huantu nitú kalhiy xlakasi puhuanahu. ²⁵Dios lacasquín pi ni pala pulactum xala c-quimacnicán caj tanuj natasiyuy, huata acxtum nalalipahuán, chu nalamaktayay. ²⁶Huachá xpalacata, lapi pulactum xala c-quimacnicán catzanajuama, xlipacs quilichatuminicacán lipuhankoy caj xpalacata huantu akspulama pulactum.

²⁷Huá chuná ccalihuaniyán sampi huixín litaxtuyátit xmacni Quimpuchinacan Jesucristo, chu lantla chatunu chatunu huixín huá tapaksiniyátit. ²⁸Xlipacs huanti lipahankoy Jesús, Dios maxquikoni tanuj tanu xtascújut huantu xlá catziy pi tlak xlacasquinca, chu nalimaktayakoy amakapitzín. Xapulh huilakó apóstoles huanti Jesús lacsackolh laquimpi naankoy lichihuínankoy xtachihuín; xlipulactuy huilakó profetas huanti Dios macatzinikoy xtalacapastacni laquimpi xlacán tlan huá nalimacatzinikoy amakapitzín; xlipulactutu huilakó makalhtahuakananín huanti tlan maakataksninankoy huantu huaniputún xtachihuín Dios; alistalh chu huilakó huanti kalhiyoy tlan xmacán nalimapacsakoy tatatlanín; makapitzín na chuná huilakó huanti tlan tlahuakoy lactlanca licacni tatlahu; xahuá huanti kalhiyoy xtascujutcán maktayakoy limaxkanín; chu huanti

tlán puxcunanikoy canajlanín; xahuá huanti maxquikoni litlihuaka laquimpi nachihuínankoy yuma ni takataksa tachihuín huantu caj xman hua Espíritu Santo machihuínán. ²⁹Huampi milicatzitcán pi ni xlipacs lilacsackocani pi apóstoles nahuankoy, na ni putum maxquikocani litlakala pi nalichihuínankoy xtalacapastacni Dios, ni xlipacs makalhtahuakananín, na ni pala xlipacs tlan tlahuakoy lactlanca licacni tascújut. ³⁰Na chuna litum ni xlipacs maxquikocani litlihuaka laquimpi namapacsakoy tatatlanín, na ni xlipacs chihuínankoy yuma tanuj tachihuín huantu Espíritu Santo machihuínán, chu na ni xlipacs tlan akatakskoy, chu maakataksninankoy huantu huaniputún yuma tachihuín huantu machihuínán Espíritu Santo. ³¹Huampi huixín huá caputzátit nakalhiyátit yuma litlakala huantu mastay Espíritu Santo, huampi caj xman huá huantu luhua tlak atzinú nalimaktayakoyátit amakapitzín mintacanajlanín.

Huanti ni paxquinán nitú xlakasi xlatámát

Hua xpalacata naccalimasiyuniyán huantu luhua pacs caminiyán nakalhiyátit, chu huantu luhua tlak atzinú nalimaktayayátit.

13 Hua pala pi quit tlan xacchihuínalh pacs tipakatzi tachihuín anán, chu hasta masqui xacakátakslí xtachihuín can ángeles, huampi lapi ni xacálhilih xaxlicana tapáxquit hua lantla tu Dios kalhiy, nitú xquililaca sampi caj xtachuná xacuá la aktum akaxculina lican tu macahuán, usu la yuma patillo xla lican tu ni tancs macasanán acxni tlacán. ²Na chuna litum lapi quit lihuana xacakátakslí xtalacapastacni Dios, chu tancs xalichihuínalh huantu xtalacasquín, chu xaccátzilh pacs

huantu xlá lachcahuilñit, chu masqui pacs xaccátzilh xlipacs tu nití acatziy tlanca tastácat, hasta xackálhñil tlanca tacanajla huantu tlan xaclimaláxcijli tlanca kastín, huampi lapi ni xlicana cpaxquinán, nitú quilakasi xtihua.

³Masqui xacmaakpitzinikolh laklimaxkanín xlipacs huantu ckalhiy xtapalh tumín, chu hasta masqui xacmacamástalh quilatámat laquimpi xquilhcuyuca xastacná, huampi lapi ni huá clitlahuay caj xpalacata cumu cpaxquinán, pus pacs yuma tlan tatlahu nitú xlakasi xquilixtáxunilh.

⁴Sampi huanti xlicana paxquinán ni lixcájnít licatziy, huata paxuhuana patiy pala tú nitlán tlahuaniy xtachixcú; xaucxilhlacachaná; huanti paxquinán ni xapilhi, ni kalhiy taskáhuít, ni ucxni tlanca catziy; na ni pala luhua talipahu makcatzicán, ni xalacapacxni, usu tlanca catziy. ⁵ni lixcájnít kalhchihuinán, usu likamán tlahuanán; ni lakcatzalacaniy huantu kalhikoy amakapitzín, chu ni huá putzay lantla caj xacstu nalaktaxtuy; ni xasítzín; ni makaxokoputún pala tú nitlán tlahuaniy xtachixcú, huata matzankananiy. ⁶Huanti xlicana paxquinán ni lipaxuhuay acxni pala tú nitlán akspulamá xtachixcú, huata huá lipaxuhuay huantu akstítum, chu huantu xtalulóktat. ⁷Huanti xlicana paxquiý xtachixcú, masqui caxatucagua nitlán natlahuanicán, chunatiyá paxquinán, paxuhuana napatíy; ni tzapu puhuama pala naakskahuicán acxni tú huanicán, chu paxuhuana kalhkalhiy huantu malacnunicanít; chu pala huantu kalhkalhima, ni chuná quitaxtumá c-xlatámat yuma chixcú, chunatiyá paxquinán, paxuhuana napatíy.

⁸Tama tapáxquit huantu Dios quincamaxquinítán laquimpi xlicana nalalipaxquiyahu, niucxnicú catiláksputli sampi xliankalhin

maclacasquinahu; masqui xlicana nachán quilhtamacú acxni nialh xlasquinca nahuán pala Dios naquincamaxquiyán xliiskalala pi tlan nalichiuhinanahu yuma ni takataksa tachihuín huantu caj xman Espiritu Santo machihuíninán, usu pala naquincamaxquiyán pala tú xliiskálalh laquimpi tancs naliakchiuhinaniyoyahu tachixcuhiútat xtalacapastacni Dios. ⁹Sampi xlipacs yuma liiskalala huantu lichihuínankoy huanti liakchiuhinankoy xtachihuín Dios ni xatakatzín, sampi ucxla quitzankanima nahuán huantu luhua xtalacapastacni Dios, chu pacs huantu lachcahuilñit. ¹⁰Huampi xlipacs huantu lanchú lakapasahu yuma actzu talacapastacni, nalakspuá acxni lihuana nalakapasahu huantu luhua xlicana xtalulóktat, chu akstítum.

¹¹Acxni quit actzu kahuasa xacuanít, xackalhchiuhinán, xalacapastacnán, chu quintalulóktat xtachuná xuanít lantla tu kalhiy actzu kahuasa; huampi acxni lihuana cchixcuhiúlalh, nialh chuná ckalhchiuhinalh, usu clacapástacli lantla acxni cajcu actzu kahuasa xacuanít. ¹²Na xtachuná chú quin huanti lipahuanahu Jesús, xliimakua unú lamahu catuxáhuat, ni lihuana lakapasahu xatí Dios, caj xtachuná quitaxtuy la caquincalacucxilhcanchán c-aktum caj lakapoklhua hualhtín, huampi lakchama quilhtamacú acxni luhua lihuana nalakapasahu lantla xlá luhua tasiyuy xastacná. Masqui chú tlaná tzinú clakapasa xtalacapastacni, huampi ni naj luhua lihuana clakapaskoy, huampi acxni yuma quilhtamacú luhua stalanca naclakapasa Dios xtachuná lantla xlá stalanca quilakapasa quit.

¹³Pulactuty anán huantu ankahlín quilikalhítacn c-quilatamatcán: xapulh pi cakalhinihu tacanajla Dios pi xlá quincamaktayayán; xlipulactuy pi

anlalhín cakalhkalhítahuilahu huantu
xlá alístalh naquincamaxquiyán, chu
xlipulacututú pì nakalhiyahu tapáxquít.
Masqui xlicana pì pulactutu huantu
quincamininiyán namakantaxtiyahu,
huata caj xman pulactum huantu luhua
atzinú kalhiy xcacni, hua tapáxquít.

**Nitú xlakasi lichihuínancán tanuj
tachihuín lapi nì huí tí huanilén
xatú luhua huaniputún**

14 Luhua anlalhín miliputzatcán
lantla xlicana napaxquinanátit,
huampi na calilakaputzátit pì Espíritu
Santo cacamaxquín xliškallala,
usu xliťlihuaka laquimpì tlan
namakantaxtiyátit aktum tlanca
xtatlahu Dios c-milatamatcán, chu
huá casquinítit yuma liskallala huantu
atzinú nacamaktayayán pì tancs
naliakchihuínanátit xtalacapastacni,
chu xtachihuín tu nacamacatziniyán.
²Sampi huantì lichihuínán yuma
tanuj tachihuín huantu Espíritu
Santo mapuhuaninán, caj xman
hua Dios lilakataquilhputay sampi
nì pala çatum akataksa huantu
xlá huan. ³Huampi huantì tlan
lakapaskoy, chu lichihuínankoy
xtalacapastacni Dios, xlicana pì
luhua maakataksnikoy amakapitzin
xtalacasquín c-xlatamatcán, chu
maakpuhuaninikoy laquimpì lihuacá
tancs nalipahuankoy. ⁴Acxni çatum
lichihuínán tanuj tachihuín laquimpì
huá nalilakataquilhputay Dios huampi
huantu tinì achatum akataksa, caj
luhua xman huá xacstu xtacanaĵla
limatlihuaklhma, huampi huantì Dios
malakapasniy xtalacapastacni, usu
xtalacasquín, chu litakalhchihuínankoy
amakapitzin, xlicana pì huata
huá luhua maktayamakó, chu
maakpuhuaninikoy lantla atzinú
akstítum nalipahuankoy.

⁵Quit xaclacásquilh pì xlipacs
huixín xlichihuínánatit yuma tanuj

tachihuín huantu caj xman hua Dios
lilakataquilhputacán, huampi huata
atzinú xaclipaxúhualh pì xlipacs huixín
xlitakalhchihuínankótit tachixcuhiťat
huantu tancs xtalacapastacni, chu
xtapaxuhuan Dios, sampi pacs
acxtum akatakskoy, nì xahuá pala
nalilakataquilhputayátit Dios tanuj
tachihuín huantu mapuhuaninán
Espíritu Santo; na ccahuaniyán pì acxni
huí tí lichihuínán tama tanuj tachihuín
c-milakstipancán, xlicasquina pì huí
achatum huantì na akataksma nahuán
tu quilhuama laquimpì nahuanilén tu
huampitún laquimpì chuná acxtum
naakatakskoy huantu Espíritu
Santo masiyunima. ⁶Huá xpalacata,
natalanín, ccalihuanian pì nitú
xlakasi masqui quit xacalakanchán,
chu c-milakstipancán xactzúculh
liakchihuínán, usu lilakataquilhputay
Dios atanuj tachihuín huantu
huixín nì akataksátit, huata huixín
camininiyán naccalítachihuínanán
tlan talacapastacni, usu takchihuín
huantu Dios quimacatzininit, usu
naccamalacaputuncuhuiniyán huantu
nì lihuana aakataksátit xtachihuín, usu
pala tú xtastacyahu lantla lacasquín
nalatapayátit.

⁷Catlhua cuenta, lapi yuma luhua
huantu litlalnancán, pala liskolh,
usu pala tú ya litlakna, pala lantla
pulacatunú nì tancs xlitlaknanca, usu
tanuj tanu xmacasánalh nì xcatzica xatú
ya litlakna mamacasanimaca, chu nitú
xmacua sampi chuná caj liakaxculinán.
⁸Na xtachuna litum pala acxni lama
putalatlahu, usu guerra, pala hua
trompeta nì tancs xmamacasanicá
chuná lantla mamacasanicá
acxni mamacxtumikocán tropa,
ťtí natacaxtaquiy tropa naankoy
paxtoknankoy c-putalatlahu? ⁹Pus
chuná chú quitaxtuy acxni huixín
lichihuínanátit atanuj tachihuín
huantu nì pala çatum caakataksniyán,

člántla chú nalıcatzıkoŷ amakapıtzın tu huıxın huanıpátı? Luhua xtachuná quıxtutuy lantla cachihuınanti c-caunın.

¹⁰ Luhua xlıcana pı unú cıtuxáhuat luhua pulaclıhuua tachihuın anán, huampi lantla pulacatunu akatakskoŷ huanti lichihuınankoy, chu maclacasquinkoy. ¹¹ Huampi lapi quit nı cakataksa pulactum tachihuın huantu naquilıtalhchihuınán çatum, pus nı lay ctakalhchihuınán, huata xala makat chıxcú quılımacán, na chuná xlá nı pala huá akataksa huantu quit quintachihuın, pus na xala mákat clımacán. ¹² Pus cumu huıxın luhua lakatılacapınátı yuma lactlanca lıtlıhuaka huantu mastay Espıritu Santo, pus huá cakalhiputúntı lacuan talacapastacni, chu lıskalala huantu tlak nalımastacayátı c-xtacanajlacán amakapıtzın huanti lıpahuanıkoŷ Jesús.

¹³ Huachá xpılacata ccalıhuanıyın palapı huı tı kalııy xlıtlıhuaka Espıritu Santo nalıchihuınán atanuj tachihuın tu nalıxakatlıŷ Dios, xıacasquınca pı na nasquınıŷ lıtlán Dios pı namaxquıŷ yuma lıtlıhueke lantla tlan namacatzınıtlıhakoy tuncán huanti na kaxmatnımakó xtachihuın. ¹⁴ Sampı lapi huá quit ctıluhuama oración, chu huá clıxakatlıma Dios yuma tanuj tachihuın tu nıtlı akataksa, xlıcana pı quılıstacna lakataquilhpıtamı Dios huampi quintalacapastacni nıtlı lıxtutuma sampı nı pala tzinú akataksma huantu clıchihuınama. ¹⁵ Pus čtı tlan quılıtláhuat? Pus luhua tlan pı xlıpacs xlıtlıhuaka quılıstacna naclıtlıhuanıŷ oración Dios atanuj tachihuın huampi na xıacasquınca pı nacmacatzınınán huantu luhua quintachihuınacán tı pacs akataksahu tu ctıhuá xapılıh. Na chuná tlan tu ctıluhuama acxni clıtlıııputún Dios atanuj tachihuın, huampi xıacasquınca pı tuncán nacmaakataksnıkoŷ amakapıtzın tu huamputún quintachihuın

huanti quınxaxmatnımakó. ¹⁶ Lapi huıx lakataquilhpıtápat Dios, chu lıxakatlıpat tanuj tachihuın huantu mastay Espıritu Santo, chu lapi antá lacxtum tayán çatum huanti acxtum tatıluhuapıtunán oración, huampi nı lay catıtamalacxtumın xtalacapastacni sampı nı pala tzinú akataksma huantu huıx quılıhuampat. ¹⁷ Masqui xlıcana pı luhua tlan lantla huıx pıxcatcatzınıpat Dios, chu lakataquilhpıtápat, huampi huanti kaxmatnımán nı pala tzinú maktayama c-xtacanajla lantla tlak akstıtum nalıpahúan Dios. ¹⁸ Cana cıpxcatcatzınıŷ Dios pı quit tlak tlan lantla clıchihuınán atanuj tachihuın laquımpı huá naclılakataquilhpıtay Dios nı xahua huıxın. ¹⁹ Huampi acxni macxtum huılakó huanti lıpahuanıkoŷ Jesús c-sıculán, chu acxni clıchihuınanıkoŷ xtachihuın Dios, huata xalıhuaca cmatlanıŷ c-quıncatalacastácat naclıchihuınán cana caj akquıtızı tachihuın huantu lıhuana naakatakskoŷ tu cuanıputunkoy, chu nıtlı xıakası masqui xacúa akcahu mıłh tachihuın huantu xalıpıxcatcatzınıłh Dios, huampi pala nıtlı xakátakslı huantu cuanıma.

²⁰ Natanlın, nı xtachuná cakalhıtı mıntalacapastacnıcán la lactzu lakskatán, huata caakatáksıtı yuma huantu ccahuanımán; masqui xlıcana pı tlan nalıxtutuyátı xtachuná la lactzu lakskatán xpılacata nı natıluhayátı talakalhın, huampi huantu akstıtum calacapastacnántı xpılacata naakataksátı quintapıhuán la tı xlıcana catzıkoŷ pı aya stackonıttá, chu kalıkoŷ tancs talacapastacni. ²¹ Lacatum c-libro antanı na tatzoktahıılanıtlı xlımapaksın Dios chuná huan: “Yama judıos huanti nıalłh tzinú quılıpahuanıkoŷ nacmacamınikoy xala makat chıxcıhuın huanti lichihuınankoy tanuj tachihuın huantu xıacán nı akatakskoŷ laquımpı fuerza namaakataksnıkoŷcan huantu

quit clacasquín cacatzikolh, huampi ni pala chuná caquintikalhakaxmatkolh.”

²² Catziyahu pi acxni Dios macaminikolh yuma chixcuhuín huanti xlichihuínankoy huantu ni pala chatum xakataksa, huá chuná litláhualh laquimpi chuná namalacahuánikoy yuma judíos huanti ni xkalhakaxmatputunkoy lantla lipecua namapatinikocán; huampi Dios ni chuná limacatzinikoy xtalacapastacni huanti lipahuankoy. ²³ Caj luhua lihuana calacapastátit yuma huantu naccahuaniyán, lapi xlipacs huixín huanti lipahuanátit Jesús macxtum huilátit, chu lantla chatunu huixín nalitlahuayátit mioracioncán tanuj tanuj tachihuín, chu xalán natanuyachá chatum huanti caj chunatá anit kaxmata huantu huixín lichihuínanátit, huampi ni canajlay, cumu ni pala tzinú akataksa huantu quilhuampátit, pus napuhuán pi caj akuitipátit. ²⁴ Huampi lapi xlipacs huanti lipahuanátit Jesús macxtum huilátit, chu huixín huanti naakchihuínanátit huá mintachihuíncán nalichihuínanátit aktum talacapastacni huantu man Dios camaxquinitán, chu lapi xamaktum nacalaktanuyachán chatum chixcú huanti caj chunata anit kaxmata huantu huixín huanátit, man naakataksa huantu huanipátit, chu nacanajlay pi na chuná xlá maklakalhinanit, chu natzucuy lacapastaca pi nitlán lantla lema xalixcajnít xlatámat. ²⁵ Xlá luhua nalipuhuán, chu nakalhapalaníy Dios xlipacs xnacú, hasta ni pala tzinú xalicatzín acxni xlá natatzokostay xpalacata nalakataquilhputay Dios, chu luhua acxnicú nataluloka pi xlicana catalamán c-milatamatcán caj xpalacata cumu akátakslí huantu cakalhakaxmatni.

Pablo lacasquín pi huantu akstítum calakataquilhputaca Dios

²⁶ Natalanín, acxni huixín tamacxtupiyátit, huantu tlan, chu akstítum calakataquilhputátit Dios

laquimpi acxtum nalamaktayalipinátit c-mintacanajlacán. Pala tí kalhiy tapaxuhuán, chu quilhtliputún, pus catatlítit, usu pala huí ti lichihuínamputún huantu Dios macatzinínit, cakaxpatnítit tu cahuaniputunán, na chuná pala tí limaxquiputún caci Dios atanuj tachihuín, tlan cachihuínalh, huampi xlasquinca pi tanu huí huanti camalacaputuncúhuilh huantu huaniputún yuma tachihuín laquimpi pacs naakataksátit huantu huanima. ²⁷ Huampi lapi huí ti la huixín lichihuínamputún ni talakapasa tanuj tachihuín laquimpi nalilakataquilhputay Dios, pus caj xman chatuy, usu kalhatutu cachihuínankolh; pulh chatum alístalh chatum, chu hasta ahuaa chatum litum; huampi xafuerza pi skálalh natayay huanti akataksa laquimpi namalacaputuncuhuíy huantu huaniputún yuma tachihuín. ²⁸ Chí hua lapi xlipacs huanti macxtum huilátit, nití anán huanti akataksa laquimpi namalacaputuncuhuíy huantu huaniputún yuma tachihuín, huata xatlán nití calichihuínalh atanuj tachihuín antani tzamacán, huata caj xacstu catzeklitachihuínalh Dios yuma tanuj tachihuín antani nití nakaxmata.

²⁹ Na chuna litum acxni huixín tamacxtupiyátit, chu huilakó huanti lichihuínamputún aktum talacapastacni huantu Dios maxquínit, talacasquín pi caj xman chatuy, usu kalhatutu huanti nalichihuínankoy, chu amakapitzín caj cacs catakáxmatlí pala tancs huantu liakchihuínamaca xtalacapastacni Dios.

³⁰ Chí lapi Dios malacahuánilh, usu macatzínilh xtalacapastacni chatum huanti antá huí, chu kaxmatma huantu liakchihuínamaca, pus huanti akchihuínama cakátxtakli, chu camáxquilh talacasquín nachihuínán yuma chixcú huanti

malacahuáñilh Dios. ³¹Chuná chu acxtum nalamaxquiyátit talacasquín pì nalìchihuinanátit huantu camacatzinìnitán Espíritu Santo, huampi nì caj acuilhaj nachihuinanátit huata xapulh nachuhuínán chatum, acxnì aya chihuínankolh tlaná chú nachihuínampalay achatum, laquimpì acxtum nalamaktayalipinátit, chu nalamaakpuhuanitiniyátit. ³²Sampi milicatzitcán pì xlipacs huanti lichihuínankoy xtalacapastacni Dios, nì mininikoy pì pulh naakchihuínamputunkoy, huata xatlán cacs catahuilakolh, chu cakahikolh hasta acxnì nalakchankoy lantla nachihuínankoy. ³³Sampi huá Dios, tlan catziy, chu nì lakatiy pala huanti lacscujnimakó caj acuilhaj nalakoy, huá lakatiy huantu calitlán, chu akstitum calakataquilhputakolh xlipacs huanti lipahuanakoy.

Acxnì macxtum nalakataquilhputayátit Dios, xlasquinca pì nalìuxxilhtiyátit, chu namacastalayátit lantla lismanikoni tlahuakoy xlipacs amakapitzín huanti lipahuanakoy. ³⁴Huá xpálacata lacchaján, nì mininikoy nachihuínankoy acxnì macxtum nalakataquilhputananátit c-siculán, huata caj cacs caquilhuankolh, sampì xlacán nì lay lacatzalakoy huanti mapaksikoy, chuná la huan c-xlìmapaksin Dios huantu makán timástalh. ³⁵Chí lapì huí tū catziputunkoy huantu nì lihuana akatakskolh huantu lichihuínamaca c-siculán, nì mininikoy naquilhán laquimpì nakalhasquinínán, huata xatlán c-xchic nakalhasquinachá xchixcú, sampì nì xtapáksit nachihuínán chatum puscát antani lakataquilhputamaca Dios.

³⁶Lapì huixín nì matlaniyátit, chu tlak tlan catziyátit tū milìtlahuatcán nì xahua amakapitzín, luhua milicatzitcán

pì yuma xtachihuín Dios huantu mastay laktáxtut nì antá macatzucunìt c-milakstipancán, na nìtū tipuhuanátit pala caj luhua man huixín miacstucán huanti camaxquín xlìmapaksín, chu makantaxtipátit. ³⁷Lapì huí tì puhuán pì lihuana akataksa huantu Dios lacasquín natlahuayahū c-quilatamatcán, chu kalhiy xtalacapastacni Espíritu Santo, pus nacatziy, chu nacanajlay pì yuma huantu lanchú quit ccatzoknimán xlicana huá xlìmapaksin Quimpuchinacán. ³⁸Huampi lapì huí tì nì matlaniy pì yuma huantu ccahuaniyán huá xlìmapaksin Dios, pus na nì pala huá camatlaninítit huantu calitakalhchihuinanán.

³⁹Natalanín, caxanilihuayá caputzátit lantla tancs nalìchihuinanátit xtachihuín Dios, huampi na chuna litum nì calihuanítit huanti lilakataquilhputay Dios huantu nì talakapasa atanuj tachihuín. ⁴⁰Huampi pala tí huixín chuná tlahuayátit, usu chihuinanátit acxnì lakataquilhputay Dios, pus huantu actancs, chu lacatitum nalìtlahuayátit chu nì caj calaliactlajapítit.

**Pablo maluloka pì Jesús
lakastakuánalh calinín
sampì tasiyúnilh**

15 Natalanín, quit clacasquín pì niucxnì napatzankayátit, usu nalakpaliputunátit yuma lipaxuhu xtamacatzinín Cristo huantu mastay laktáxtut, chu huantu huixín canajlátit acxnì quit ccaliakchihuinaninítán, chu ctaluloka pì chunatiyá lipahuanátit. ²Sampi xlicana pì huá yuma tachihuín huantu calakmaxtuninítán milistacnacán, lapì xlicana tlihuaklh kalhihuilátit. Huampi lapì nì luhua talulokátit, usu xalán pala laclatayayátit, xlicana pì nìtū xlakasi masqui makasá lantla tzucútìt lipahuanátit Jesús.

³Quit nítú ccamáaktzekuilininitán, huata tancs ccalitakalhchihuiñanítán xtachuná lantla quimasiyunicanít pì maktum quilhtamacú Cristo maknícá, nìlh caj xpalacata quintalakalhincán chuná lantla xamakan quilhtamacú tatzoktahuilanít xtachihuín Dios c-Likalhtahuaka, ⁴chú acxnì nìlh, māacnūcā c-xtahuaxnì, huāmpì caj xliaktutu quilhtamacú xlā lakastakuánalh calínín, ⁵chú nì līmakas quilhtamacú tasiyúnìlh Pedro, chú amakapitzín apóstoles. ⁶Alīstālh lītum chú nā tasiyunikolh lūhuhā māx pala akquitizis ciento, masqui xlicānā pì makapitzín huāntī timāucxilhnīkolh aya nīkonīt, huāmpì atzinū lūhuhā huāntī lamakojcū. ⁷Nī makas lītum tasiyunipā Santiago, chú xlipacs apóstoles.

⁸Nā hasta luhua alīstālh xaahuatīyā lantla xlipacs amakapitzín, quit quintitasiyúnìlh masqui nì xquiminínìlh pì chuná naquilakalhamán, hasta tlan tahuán pì clītáxtulh lā chatum skatā huāntī takalanā lacáchìlh. ⁹Pus masqui nā Jesús quilácsacñì pì xapóstol naclītānuy, hasta nì pala tzní quiminínìy chuná naquilīmapacuhuicán, sām̄pì xapulh quit līpecuā xacputzastalakoy huāntī xlipahuankoy Quimpuchinacan Jesús. ¹⁰Huāmpì nā apóstol quit sām̄pì huā Dios chuná lacasquinīt, chú quilakalhamanīt, huāmpì nītú caj clactlahuamīnimā xtalakalhamán sām̄pì quit aya tlak xalīhuacā cscujnīt, nì xahua xlipacscan amakapitzín apóstoles; masqui xlicānā pì nì quīacstu cscujnīt huāmpì huā Dios scujnīt c-quilatāmat. ¹¹Huāmpì quit nì caj xman huā clīchihuīnamā pala quit tlak lūhuhā huāntū clīscujninītā Dios, usu pala huā amakapitzín apóstoles, sām̄pì yumā nītú xlakasī pala caj quīacstucán clītātlanquiyāhu quintascujtácā, huata huā luhua kalhīy xlakasī

yumā xtachihuín Dios huāntū quin clīakchihuīnanāhu, chú pì huixín līpahuanīt Quimpuchinacan Jesús.

Lapī Cristo nī lakastakuananīt, nā nī pala quit catilakastakuanahu

¹²Bueno, cumu yumā tachihuín huāntū quin clīakchihuīnanāhu antā tancs cmaḷulokāhu pì Cristo tilakastakuánalh calínín, ítūhuan chá makapitzín huixín huanātīt pì nī lay lakastakuanankoy nīnín calínín? ¹³Sām̄pì lapī xlicānā pì nīnín nī lakastakuanankoy calínín, entonces nā nī pala huā Cristo lakastakuananīt. ¹⁴Chī lapī nī lakastakuánalh Cristo, nī anū tū xlakasī yumā xtachihuín Dios huāntū quit clīakchihuīnanāhu, chú nā nītú xlakasī masqui huixín līpahuanātīt, chú kalhīniyātīt tacānājla. ¹⁵Chú xlipacs quin apóstoles clītāxtuyāhu xtachunā la aksanīnanín, sām̄pì tancs cmaḷulokāhu pì Dios mālakastakuánìlh Cristo calínín, chú cuanāhu pì lamā xastacnā. Lapī nīnín nī lakastakuanankoy calínín lantla huankoy makapitzín, entonces Dios nītú mālakastakuanīmā Cristo. ¹⁶Luhua lacatancs cacatzītīt, lapī nīnín nī lakastakuanankoy calínín, pus nā nī pala huā Cristo lakastakuananīt. ¹⁷Chī lapī nī lakastakuananīt Cristo calínín, pus nītú xlakasī mintacānājlacán; nā chunacū līaktzankatayapātīt mintalakalhincán sām̄pì nītú camatzankānāpācāntīt. ¹⁸Lapī Cristo nī lamā xastacnā, xlipacs yumā huāntī aya nīkonīt huāmpì xlipahuankoy pì xlā nalakmāxtukoy, nā aktzankatayakonīt c-pupatīn. ¹⁹Lapī quin caj xman huā cānālayāhu pì Cristo tlan quīncamakātayayān unū catuxāhuat xlimakuā lamāhu xastacnā, huāmpì lapī nīalīh lay naquīncamakātayayān, chú naquīncalakmāxtuyān calínín, chú lapī chunā xquītāxtulh, luhua līlakaputza cānājanín nahuanāhu.

²⁰Huampí huantü luhua xtalulóktat xlicana pi Cristo lakastakuananít calínín, chü lámaj nahuán xastacná caxanilihuayá xtihua. Hua yuma Cristo luhua pulana lakastakuánalh calínín laquimpí lihuana nacanajlayahu pi Dios na chuná namalakastakuaníkoj xlipacs huantí lipahuanakoy. ²¹Cumu pi caj xpalacata chatum chixcú huantí malacatzuquichá lantla pacs nalacnitamakoy, na chuná chú caj xpalacata chatum chixcú huantí lakastakuánalh calínín xlipacs tachixcuhuítat nalakastakuanankoy. ²²Xtachuná lantla tñilh Adán, xlipacs na putum ti nalacachinkoy xquilhtzúcut na naníkoj, sampí hua Adán xmalacatzuquikonítanchá, huampí xlipacs huantí tapaksínikoy Cristo c-xlatamatcán, na nalakastakuanankoy acxni naníkoj xtachuná lantla Jesús lakastakuánalh acxni nilh. ²³Putum pacs nakantaxtuy lantla Dios lachcahuilínit namalakastakuaníkoj tachixcuhuítat, chü chunatiyá kantaxtuma, sampí pulana huá lakastakuánalh Cristo, chü acxni chú namimupalay xlimaktuy catuxáhuat acxnicú nalakastakuanankoy huantí lipahuanakoy. ²⁴Acxni namín Cristo xlimaktuy unú catuxáhuat, xlá natzucuy mapaksínán hasta acxni namakatlajakoy, chü akchipanikonít nahuán xtamalancán xlipacs caxaticahua huantí mapaksínankoy, chü puxcúhuilakoj nahuán unú catuxáhuat, chü c-akapún. Acxni chú xman hua Cristo huantí xlicatlanca namapaksínán acxnicú namacamaxquiy Quintlatican Dios xlipacs yuma tamalán tü maklhtinanít nahuán; acxni chuná namakantaxtíkoj, entonces na acxnitiyá nasputcán. ²⁵Huampí xlasquinca pi Cristo mapaksínama nahuán xtachuná lantla tlanca puxcu, hasta acxni makatlajakonít nahuán xlipacs huantí tlatlahuakoy

sampí ni lakachixcuhuiputunkoy. ²⁶Chü huantü ahuatiyá tamalán, usu litlihuaka tü nalactlahuay hua xlá xpuchina calínín huantí ankalhíná quincamalaktzankaputunán sampí xlipacs quin niyahu. ²⁷Huampí hua lantla huan c-Likalhtahuaka pi Dios namaxquíkoj litlihuaka Cristo laquimpí caj xman huá xacstü namapaksínán c-xlicatlanca catuxáhuat, chü akapún, ni huamputún pi Cristo na huá chú namapaksiy Quintlatican Dios, sampí huata hua Dios maxquínit litlihuaka, chü limapaksín Cristo laquimpí namapaksínán. ²⁸Na acxni paca huatiyá mapaksiy nahuán Cristo lantla caxatucahua tü anán, huatiya Cristo chú man natapaksíniy Quintlatican Dios, sampí huá maxquínit xlipacs xlimapaksín, xahuachí sampí huá xtlát; chü caxanilihuayaj quilhtamacú c-akapún, chü catiyatna namapaksínán Dios sampí xman huá xliankalhín miníniy natayaniy, chü tlanca xlacatzúcut nakalhiy.

²⁹Lapi ni chuná, caquihuanítit huixín xala c-Corinto huantí takmunuyátit xlimaktuy caj xpalacacacán yuma huantí aya níkonít, chü ni xtakmunukonít, étü quitaxtunikoy ti palacatakmunuyátit ninín lapi ni canajlayátit pi ninín lakastakuanankoy calínín? Lapi niucxnicú catilakastakuanankolh, étúhuan chá limaktayaputunkoyátit? ³⁰Na chuná quin huantí lhuha tü clipatimahu caj cumu huá cliakchihuinanahu xtachihuín Jesús; lapi ninín ni lakastakuanankoy calínín, étü quincaquitaxtuniyán chuná cliakaputzamahu caxatucahua hora? ³¹Sampí xlicana pi chalí chalí ni tzankay ti quincamakiniputunán, chü yumá huantü ccahuanimán huá xtalulóktat, ni cakskahuinama, na chuná lantla ni cakskahuinán acxni cuan pi clipaxuhuay mimpalacata lantla xlipacs minacucán lipahuanátit Jesús.

³²Quit lipecua tu cpátilh c-xacachiquin Efeso acxnī xquimakniputunkoy yuma chixcuhuñ huantī la xalaclicuj chichixnī xlicatzikoy. ¿Tú xlakasi quinquixtaxtúnilh yumá lantla ctitalalakapaxtokkolh hua lapī nī lakastakuanankoy ninín? Huata max tlak xatlán xquinxtaxtúnilh, na chuná xaclatámah la huankoy makapitzín huantī nī lipahuankoy Dios: “Xlimakua tlan lamahu, capaxuhahu, tlan cahuayahu, chu cakachihu, sampi nī catziyahu pala chalí, usu tuxama naniyahu.”

³³Huampi nī tilimakaxtakátit nacaakskahuiyán huantī chuná nahuanikoyán, sampi lapī natalatapakoyátit huantī chuná lixcájnī līcatzikoy tlan nacamaaktzankayán. ³⁴Caakachitántit tu xatlán, nī calaclatayátit, akstítum calatapátit, chu nialh caaktzankátit. Hua chuná ccalihuaniyán laquimpī nalacamaxananátit, sampi cpuhuán pī makapitzín huixín huantī nī pala lakapasátit xtalacapastacni Dios lantla lacasquín nalatamayahu, chu lantla nalipahuanahu.

Lantla naquixtaxtuy acxnī nalakastakuanankoy ninín

³⁵Xamaktum huī tī nakalhasquinín: ¿Lántla naquixtaxtuy acxnī nalakastakuanankoy ninín? Usu ¿xatú ya macni cahuá nakalhikoy alistalh? ³⁶Xlicana pī luhua mákat aktzankay huantī chuná puhuan sampi chuná naakspulay lantla akspulay aktum cuxī acxnī chancán, xafuerza nalakspuá xliaktumínica c-tíyat laquimpī napulha xaxáhuat, chu nalhuhuán xacuxi. ³⁷Sampi huantū chancán nī hua xaxáhuat huampi huá xacuxi, usu pala catuyahuá lichánat, pacs xtalhtzi chancán. ³⁸Chu alistalh acxnī napún, Dios chuná malacatzucunīy xakanín lantla xlá

tlak matlanīy natasiyukoy, xahuachí lantla pulacatuñ tachanán tanuj tanu xatuhuan, xahuá xakanín. ³⁹Pus na chuná chú tanu xmacni tantum cahuayu, na tanu xmacni squiti, na tanu lītum xmacni lactzu spun, chu quin na tanu kalhiyahu quimacnicán. ⁴⁰Pus xtachuná lantla catziyátit pī huantū unū anán, tanu tanu kalhikoy xmacnicán, na chuná chú c-akapún na tanu kalhikoy xmacnicán nī xahuá lantla kalhiyahu quimacnicán; sampi yuma quimacnicán nī lay tatalacastuca huantū xlacán xmacnicán, na nī pala huantū kalhikoy xlacán xmacnicán nī lay tatalacastuca quimacnicán. ⁴¹Na chuna lītum tlan natamalacastucahu cxkakanat chichinī, atzinū luhua tlan lacahuánán cxkakánat nī xahuá cxkakanat papá, chu na chuná stacu, na tanu kalhikoy cxkakanatcán, makapitzín tlak makaxkakanán, chu makapitzín nī chuná.

⁴²Na chuná chú naquixtaxtuy acxnī ninín nalakastakuanankoy calínín; yuma quimacnicán huantū kalhiyahu catuxáhuat, acxnī naniyahu, chu namaacnucán quintiyatlīhuacán, lacmastacnuy, huampi yuma quimacnicán huantū nakalhīyahu acxnī nalakastakuananahu calínín nialh ucxnī catiláksputli. ⁴³Yuma quimacnicán huantū kalhiyahu luhua līlakaputza, xahuachí acxnī naniyahu maktum laclatamay, huampi huantū nalīlakastakuananahu luhua līlakátit; xahuachí tlihuaka, nialh catitaxlajuánilh. ⁴⁴Acxnī niyahu namaacnucán yuma quiquintiyatlīhuacán xala catuxáhuat huantū kalhiy līhua, chu lūcut, chu nalakastakuanán huantū tlan nalīlatamayahu c-akapún huantū nī nakalhīy līhua, chu lūcut tu nalakspuata. Lapī Dios tlan quincamaxquínitán quimacnicán nīma kalhiy līhua, chu lūcut, na tlan naquincamaxquiyachán

tanuj quimacnicán xala akapún nima nialh tú maclacasquín.

⁴⁵C-Likalhtahuaka chuná huan:

“Yama Adán huanti xapulh chixcú, acxni Dios tláhualh, máxquilh xlistacna, chu xmacni xla lihua, chu lúcú huantu nalakspu”; huampi Cristo na milh litaxtuy xtachuná lantla chatum litum xapulh chixcu lantla Adán, sampi acxni lakastakuánalh milh litaxtuy chatum spíritu ti tlan natzucuy quincamaxquiyán yuma latámat xala akapún xtachuná lantla huantu tzúculh kalhiy. ⁴⁶Huampi Dios lacasquiní pi pulana huá nakalhiyahu yuma quimacnicán huantu xla lihua, chu xla lúcú huantu lakspu acxni naniyahu, chu alistalh nakalhiyahu yuma quimacnicán huantu nialh ucxni catiláksputi.

⁴⁷Yama Adán huanti xapulh chixcú, huá xlimacacatzuquicaní pokxni tíyat, chu acxni níl pi huatiya tíyat huampá xmacni; huampi Cristo huanti ahuata macámil Dios, xlicana pi antá c-akapún xminítanchá, chu antá tapaksiy c-akapún. ⁴⁸Xlipacs huanti lacachinkoní catiyatna, chuná kalhikoy xmacnicán xtachuná lantla yuma xapulana chixcú huanti xlitlahuacaní tíyat, huampi xlipacs huanti lipahuankoy Jesús nakalhikoy xmacnicán xtachuná lantla yuma huantu xlá kalhiy, sampi Jesús antá xala c-akapún.

⁴⁹Cumu xtachuná lhkamanitahu quimacnicán lantla xkalhiy xmacni Adán huanti xlitlahuacaní tíyat, pus na xtachuná natasiyuyahu, chu nakalhiyahu quimacnicán lantla kalhiy Cristo huanti xala c-akapún.

⁵⁰Natalanín, luhua milicatzitcán pi xlipacs huantu lakspu lantla quimacnicán huantu kalhiy lihua, chu lúcú, ni lay lakchankoyachá c-akapún antani huí Dios, sampi nitú xlasaj nakalhiyahu quimacnicán

huantu ni makas quilhtamacú naniy antani lamacaj nahuán caxanilihuayá xtihua. ⁵¹Ucchahuaniyán aktum huantu caj tzek talulótkat, huampi huá Dios quimacatziní: Masqui ni pacs anikoy nahuán huanti lipahuankoy Jesús, huampi acxtum pacs namakltinana hu xasasti quimacnicán huantu naquincamaxquicanán. ⁵²Yumá huantu cchahuaniyán nakantaxtuy acxni ahuata namacasánan trompeta, huampi caj aktum lacapala huantu nalay, xtachuná lantla maktum calákkampxti milakastapu. Acxni ahuata namacasánan trompeta xlipacs ninín nalakastakuanankoy calín laquimpi nialh ucxni catinikolh, chinchu xlipacs quin huanti ni aniyahu nahuán naquincacaxyahuacanán, chu chuná namakltinana hu tanuj xasasti quimacnicán. ⁵³Sampi yuma quimacnicán huantu lanchú kalhiyahu, laclay, niy, chu lakspu, talacasquín pi naquincamaxquicanán tanuj xasasti quimacnicán huantu ni laclay, na ni pala catiláksputi. ⁵⁴Acxni xlipacs makltinanihu nahuán yuma quimacnicán huantu nialh laclay, ni pala niy, tancs kantaxtuní nahuán huantu tatzoktahuilaní xtachihuín Dios c-Likalhtahuaka antani chuná huan: “Yama xpuchina linín aya maklticaní xlitlihuaka laquimpi nialh tí namaaktzankay tachixcuhiútat. ⁵⁵¿Ní chu alh xlitlihuaka xpuchina linín? ¿Lántla pi nialh lay chú maaktzankakoy tachixcuhiútat?” ⁵⁶Tama xpuchina linín tlan xquincamaaktzankayán sampi luhua luhua lantla xtlahuanihu talakalhin catuxáhuat, huampi luhua alisok quincamacatzinín xlimapaksin Moisés pi nitlan lantla xlamahu. ⁵⁷Huampi paxcatatzinilh Dios pi makltiní xlitlihuaka xpuchina linín laquimpi nialh lay naquincamaaktzankayán, sampi huá quincamaxquinitán litlihuaka

Quimpuchinacan Jesucristo laquimpi namakatlayahu. ⁵⁸Natalanín, quit luhua ccapaxquiyán, huá xpalacata ccalihuaniyán pì tlihuaklh cahuilítit mintacanajlacán, chù nì cataxlajuanítit, huata atzinú tlak akstítum caliscújtít laquimpi nalipahuancán Jesús; sampi huixín stalanca catziyátit pì xlipacs huantù tlahuapátit, nì caj chunatá catihua mintatlakuacán, xlá catziy lantla nacamaskahuiyán.

**Pablo lichihuínán pì lacatzucu
camastokkqlh tumín tū
nalimaktayananakoy**

16 Na chuna litum ccamalacapastacniputunán xpalacata yuma tumín huantù huixín mastokpátit laquimpi nalimaktayakoyátit yuma limaxkanín xala c-Jerusalén huantì nà lipahuankoy Jesús. Quit clacasquín pì chuná namastokátit xtachuná lantla cuanikonit natlahuakoy yuma canajlanín xala c-akatunu siculán tū huilakó c-xatiyat Galacia. ²Calakchanán pì mixatujunán domingo namaquítihayátit acatzunín mintumíncan huantù tlajanitántit nahuán xlipacs semana, laquimpi acxnì quit naccalakanachán, nì acu lanaj nalayátit namastokputunátit tumín huantù nalimaktayananátit. ³Huata acxnì quit nacchanachá, cata caj xman nalacsacxtuyátit makapitzin chixcuhuín huantì atzinú huixín lipahuankoyátit laquimpi huá nalenkoy mincartajcán, chù tamà tumín huantù huixín nalimaktayananátit. Nà acxnì ccalakchanitanchaná nahuán, huantì huixín nalacsacátit, huá yumá nactamalakachakoy carta, laquimpi huá nalenkoy c-Jerusalén mintataquincán. ⁴Chí lapi luhua xlasquinca nahuán pì quit nà nacán, pus quit man nactaankoy.

**Pablo lichihuínán pì naán
lakapaxialhnankoy tì xala
c-xacachiquín Corinto**

⁵Cpuhuán pì acxnì naccalakanachán c-mincachiquín Corinto, pulana antá nactitaxtuy c-xatiyat Macedonia, hasta alistalh chú naccalakanachán. ⁶Xamaktum pala fuerza makas nactamakaxtaká c-mincachiquincán, huampi cpuhuán pì antá cuij nahuán hasta natitaxtukoy calonkni. Chù lapi antá nactamakaxtaká, pus acxnì chú nactacaxpalay laquimpi nacán alacatanu cachiquín, huixín naquimaktayayátit, chù naquimaxquiyátit huantù quit nacmaclacasquín c-tiji. ⁷Quit nì caj ccatlakapaxialhnamán tzinu quilhtamacú, huata cpuhuán pì tzinu makas naccatalatamayán, lapi Quimpuchinacan Dios lacasquín. ⁸Huampi lanchú antacú unú nactamakaxtaká c-Efeso hasta natitaxtukoy xapascuaj Pentecostés. ⁹Sampi luhua clipaxuhuay lantla unú clixakatlikoy luhua chixcuhuín xtachihuín Jesús, chù xlacán lipahuankoy, masqui nà luhua lamakó huantù nì matlanikoy huantù quit clichihuínama. ¹⁰Na chuna litum ccahuaniyán lapi xamaktum nacalakchanachán quintalacan Timoteo, camaktayátit, chù capaxquítit, xahuachí camaxquítit cajnì tū luhua mininiy kalhiy sampi xlá nà huá liscujma xtachihuín Quimpuchinacan Jesús xtachuná lantla quit. ¹¹Pus nì pala chatum tì calakmákalh, sampi luhua cajcú kahuasa, huata lipaxuhu camaktayátit, chù camaxquítit huantù namaclacasquín c-tiji laquimpi naquilakmín, sampi quit, chù amakapitzin natalanín kkalhimahu pì nì makas naquincalakminán. ¹²Quit cuánilh quintalacan Apolos pì lacxtum cataankochá

makapitzin natalanin laquimpi
nacalakapaxialhnanan, huampi
xlá quihuánih pi ni naj catianchá,
sampi ni limakuaniy, huampi fuerza
nacalakanachán acxni nalimakuaniy.

**Pablo ahuata xakatlikoy
natalanin xala c-Corinto**

¹³Ahuata ccahuaniyan pi skálalh
catahuilátit, camaktakálhtit
laquimpi akstítum nalilatapayátit
mintacanajlacán. Luhua chixcuhuín
cahuántit, na catatlihuáklhtit laquimpi
ni nataxlajuaniyátit. ¹⁴Xlipacs huantu
lactzú lactzú xtlahuátit, luhua lipaxuhu
catlahuátit laquimpi natasiyuy pi
huixin xlicana kalhiyátit tapáxquit.

¹⁵Natalanin, huixin max catziyátit
pi antá c-xatiyat Acaya hua Estéfnas,
chu huanti xala c-xchic, hua xlacán
luhua xakasiya lipahuankolh Jesús; chu
hasta lantla lipahuankonit Jesús xlacán
ankalhín lipaxuhu makamaktayakonit,
chu liscujkonit xtacanajlanin.

¹⁶Huá chuná ccalimalacapastacamán
sampi quit clacasquin pi chuná
na namaktayakoyátit, chu
nakalhaxpatkoyátit huantu xlacán
huankoy xlipacs huanti kalhikoy tlan
talacapastacni, xtachuná lantla xlacán
kalhikoy.

¹⁷Xlicana pi luhua cpaxuhuay
pi minkolh quilakapaxialhnankoy
Estéfnas, Fortunato, chu Acaico,
pus masqui amakapitzin huixin
ni lay tatántit cumu mákat.

¹⁸Xlacán makapaxuhuakolh
quinacú acxni xaclipuhuama,

chu quit stalanca ccatziy pi na
chuná makapaxuhuankonit
c-milakstipanacán; pus yuma
chixcuhuín mininikoy pi huixin
napaxcatcatziyátit caj xpalacata
huantu tlahuakoy, chu lantla
paxquinankoy. ¹⁹Xlipacs huanti
lipahuankoy Jesús lantla c-akatunu
cachiquín unú lacatzú c-Asia luhua
lipaxuhu caxakatli lacamachán.
Na chuná Aquila, Prisca, chu
xlipacs huanti tamacxtumikoy
c-xchic, luhua cana lipaxuhu
caxakatli lacamachán, sampi acxtum
lipahuanátit Jesús. ²⁰Na chuná
pacs natalanin huanti lipahuankoy
Jesús unú c-Efeso pacs lipaxuhu
caxakatli lacamachán. Clacasquin
pi huantu tlan calasnátit, chu
calalacatzúctit, xahuachí cacatzítit
pi lampala quit ccaxakatlimán
xachatum.

²¹Chu yuma ahuata tachihuín
huantu naccahuaniyan, xlicana man
cmacanitzokma.

²²Lapi huí ti ni lipahuamputún
Quimpuchinacan Jesucristo, chu
lakmakán, pus tancs cacatzilh pi xacstu
aktzankatayama. iQuimpuchinacán
mima!

²³Quit clacasquin pi
Quimpuchinacan Jesucristo
ankalhín cacalakalhamán, chu
cacasiculana tlahuán. ²⁴Xlipacs
huixin quit ccapaxquiyán xtachuná
lantla linatalán, sampi xlipacs quin
canajlaniyahu, chu lipahuana hu Cristo
Jesús.